

金光明經文句卷第一

盟一

隋天台智者大師說

門人灌頂錄

此四卷文總有十八品舊來分割盈縮不同江北諸師以初品爲序壽量下訖捨身爲正讚佛爲流通正文又三壽量下是正說四王下大誓護經除病下大悲接物江南諸師以初品爲序壽量下爲正四王下十三品爲流通真諦三藏分新文二十二品初品爲序壽量下至捨身十九品爲正後兩品爲流通真

諦釋云壽量明師果懺歎兩品明弟子因授記是弟子果除病是師因四王下正論力用前師果弟因既爲正後師弟因果何得爲流通邪今師謂分文本是人情人情感謂序未辨道流通歇末不得論師弟因果是義不然夫三段者不可杜斷隔絕序本序於正通序則有三義正本正於序通正亦三義通本通於正序通亦三義上中下語皆善故又衆生得道根性不定何容序無滋味流通歇末邪既不歇末說師弟因果亦應何妨如序中說

正亦應無妨流通中有正意彌是督勵宣行
不乖經意又法華中明阿私仙是師因持品
授弟子果記諸師咸判是流通此有其例於
義無妨與奪由人不須苦執也今從如是我
聞入壽量訖天龍集信相菩薩室爲序段從
爾時四佛下訖空品正說段從四王品下訖
經流通段序者序將有利益正者正當機辨
道流通者流名下注通名不壅欲使正法之
水從今以注當聖教筌筩不壅於來世經曰
上中下語皆善即此義也疑者云序分何得

入正品中衆經例爾如維摩無序品序在正
說中大品正說在序品中涅槃序分入正品
中衆經皆然不以爲疑何獨或此斯乃出經
者意爲四佛斷疑孤然而起其文嶄絕引序
分安壽量中今從義便不得齊品分割也序
有三義一次緒二敘述三發起次緒者居一
部之初冠衆說之首故言次緒敘述者敘於
方將述於當益故言敘述發起者發其信心
起於教也一段經文含此三義故題爲序品
品者梵語稱爲跋渠此爲品也品是類義此

中文句氣類相從節之為跋渠例如律中有篇聚毗曇有捷度爾從如是下是次緒從是時如來下是敘述從其室自然廣博嚴事下是發起次緒之序舊云五事地人開佛是為六事此經天龍集信相室不聞前序不聞後夢亦得是同聞亦得是非也同聞眾少不次第云云此之五六亦名印定序三世諸佛經初比皆安如是故亦名通序與諸經同亦為通名作本故亦名經後序結集者所置故亦名經前序遺囑令安故亦名破邪序對破外道阿

漚故亦名證信序令聞者不疑故天台師云總此六說都是四悉檀意也諸佛諸經同是世界悉檀也經前經後為利來世是為人悉檀也對破外道是對治悉檀也信順無疑是第一義悉檀也舊解如名不異是曰無非阿難所傳文句四一似瀉水分餅與佛三一種故不異稱如文下之理允當無謬故無非曰是略而言之文如理是肇師云如是者信順之辭也信則所聞之理會順則師資之道成真諦三藏云如是者決定也數決定理決定佛說此

經有若干文句若多成增謗若少成減謗阿難傳之如瀉水不多不少故數決定佛說無相之理不有不無若有憶增若無憶減阿難傳之無增無減故理決定龍樹解如是者信順之辭也信者言是事如是不信者言是事不如是此之四解各據一悉檀意舊解語總不顯文詮何等理為如何等理為文所詮為是既不顯了只是世界悉檀意肇師據信順是為人三藏文理決定為對治龍樹信順如是為第一義云云今作通別二釋佛如法相而

說阿難如聞相而傳故言如也佛如法相而解阿難如海量而受故言是也云云別釋者外曰阿漚稱吉文乖其理故非如理異其文故非是不可見阿漚在初而中後皆吉也文如其理故言如理如其文故言是今謂三藏經初云如是二諦各異故非如理淺故非是摩訶衍二諦相即故言如理深故言是今謂三人同聞而各解故非如證入優劣故非是唯菩薩所聞者為如菩薩所到者為是今謂離邊明中之文則非如出二諦之外有中道則

非是文字性離即是於如故言如一切法即佛法名之爲是初破邪明正即三藏經如是次破異明同即通教經如是次破淺明深即別教經如是次破離明中即圓教經如是此經既是方等通被根性不同作種種說無咎觀心解者觀與境冥故爲如境即正觀故爲是經言如此觀者即是正觀若他觀者名爲邪觀即其義也我聞者舊云阿難不師心親承佛旨故曰我聞真諦曰我是器義一散心名覆器無聞慧故二忘心名漏器雖得而失

無思慧故三倒心名穢器非而謂是無修慧故阿難無三過唯是善好器親承有在故言我聞釋論云耳根不壞聲在可聞處作心諦聽因緣和合故稱聞阿難與聽衆述佛遺旨親承不謬故言我聞師釋我有四義謂我我我無我我我無我我我無我而不二真我義配四根性人云聞亦四義謂聞聞聞不聞不聞聞不聞不聞配四教法人云有四種阿難謂歡喜阿難賢阿難典藏阿難海阿難爲四種緣立四種名歡喜阿難是我我用聞聞親承丈

六身佛持三藏法故言我我聞聞賢阿難是我無我用聞不聞親承丈六尊特合身佛持通法故言我無我聞不聞典藏阿難是無我用不聞聞親承尊特身佛持別法故言無我我不聞聞海阿難是我無我而不二用不聞不聞親承^五法身佛持圓法故言我無我而不二用不聞不聞此經通三乘說聽一音各解故須分別^云觀解者若作攀上厭下觀是爲我我聞聞若作析體兩種從假入空觀皆是我無我聞不聞若作從空出假觀是無我

我不聞聞若作中道觀是真我不聞不聞一時者肇師云法王啓運嘉會之時也三藏云高時下時皆是若過若不及不堪聞法唯有平時即是一時也私謂高時慢心不行下時耽荒五欲不耽不慢是平時也師釋衆生感法佛慈赴教機應之時也亦是發真見諦之時也亦是法眼明朗照世之時也亦是佛眼照中之時也^云而言一者若前思後覺斯二非一思覺妄斷豁悟之時故言一時也觀解者從假入空與真一時從空入假與機一時

中道正觀與法性一時云佛者真諦云佛有三義一切智異外道慈悲異二乘平等異小菩薩餘人無此釋論明佛是第九號佛名為覺覺世間出世間常無數非數等朗然大悟故名爲佛天台師云佛者依一切智有丈六佛依道種智有丈六尊特佛依一切種智有法身佛三佛不得一異非一異而一異爾觀解者空觀覺知諸法一相假觀覺知諸法種種相中觀覺知諸法無一異相亦一異相云住者佛是能住王舍城是所住處真諦明

住法有八一住大千界內二住依止處王城也三住五分法身壽命現在也四住威儀利物五天住住禪定六梵住住四等慈悲七聖住住三三昧八大處住住第一義也釋論四住攝八也天住梵住攝其天住定住聖住攝其五分命住佛住攝其大處住六又有迹住王舍城攝其界內依止威儀三住天台師云丈六身佛住真諦也丈六尊特合身佛雙住真中也尊特身佛雙住俗中也法身佛住中道也觀解空觀住真假觀住俗第一義觀住中

王舍城者釋論大出因緣初立五山中七燒
七造王來居此故言王舍又云他舍被燒王
舍不燒後悉排云是王舍即得免燒自是已
來呼爲王舍觀解五陰爲舍心王居之故言
王舍者閣崛山者釋論翻鷲頭真諦云曲鳥
山在王舍城東南毗富羅山在西南仙人山
在西北黑土山在東北白土山在中央中央
三由旬平正即王城也觀心山者靈即神智
是般若也鷲即萬德是解脫也山即不動是
法身也常爲心王所觀即是觀之住處也令

一切心數同入其中也此經闕同聞衆者謂
時有五處有四者山衆不聞信相室說信相
室衆不聞夢中說夢中衆不聞夢覺已說衆
非一座故不列同聞若爾阿難不應稱我聞
然雖不聞佛更爲說又其得佛覺三昧能自
通達得稱我聞也從是時如來下是敘述序
叙下十七品故亦名別序簡異餘經亦爲別
名作本故言別也別義爲七一從是時如來
下一行半是入定別二從是金光明下訖二
十七行偈是敘述別三從壽量品下是懷疑

別四從大士如是下是瑞應別五從信相見
佛下是騰疑念別六從四佛告下是止疑別
七從欲色界天下是集眾別生起者佛常在
定而羣機扣佛佛欲應之故示軌儀如來常
寂猶尚樂定入游法性出敘經王信相聞深
法疑法既是常人壽那短是故懷疑菩薩福
力疑能感應應故四佛現佛現即騰疑騰疑
故佛即止疑當雨法雨故大眾雲集七事異
他經故言別也已說七別竟或時作三別一
從是時下名敘述序二從壽量品下名現瑞

序三從時四如來下是眾集序云云言敘述序
者敘後十七品初五行敘壽量品爲三初兩
行敘果德次一行敘懷疑次兩行敘斷疑細
作可尋次一行半敘懺悔品破惡生善之意
云云次一行半敘讚歎品生善破惡云云次六行
敘空品破惡中破三障惡云云從護世四王下
是敘其品可解大辯者是敘其品尼連鬼母
是敘功德天品同是女天故地神是敘其品
大梵三十三天是敘散脂品散脂是將梵釋
是主敘主即得臣將也緊那羅等是其領敘

其領得其管也我今所說諸佛秘密者是敘
正論善集兩品說世秘密可以治國出世秘
密可以詣道故知敘兩品也若得聞經去是
敘鬼神品鬼神品中純明聽法功德為八部
所護云著淨衣服下兩行敘授記品三大士
十千天淨心殷重淨若虛空故獲授記也若
得聽聞下敘除病流水等品聞名服藥悉得
病除則是善得人身復能修行布施福業是
善得人道魚聞佛名善得天身天道即此意
也正命是敘捨身品虎殮血肉即得解脫豈

非正命也若聞懺悔下一行敘讚佛品佛有
三世諸菩薩多是先佛即過去佛也又是未
來佛也為此菩薩所讚即為佛所讚也敘述
之意止可彷彿不得遠自分明云問誰作敘
述舊云集經者若爾是論非經又乖經文文
云我今當說或云是信相若爾信相已能玄
敘何事致疑又非集經者那忽作序師云是
佛自作難者言若爾便是正經那得稱序此
無所妨菩薩尚能安禪合掌說千萬偈況如
來口密神力赴機何所不為文云我今當說

懺悔等法此是明證大品中化佛說六波羅蜜亦得稱序此其例也釋入定爲三初一句一字明能游人二三字兩句歎所遊法後兩句結也是時者真諦云有五種三時一欲說正說說已二破外道去來時立現在有說有聽時三下種成熟解脫時四正師九正教正學時五佛欲說衆欲聽不高不下平平時今但論如來知機堪可得道時若慧眼得道智與真冥時若法眼得道智與俗冥時若佛眼得道智與中冥時佛欲履歷法性觀知衆生於

何時得道故言是時也如來者十號之初也三藏解如來文多不載今言智照理與諸佛等故言如慈悲與諸佛等故言來諸佛應住祕蜜藏中何故出世只爲慈悲故來成論云乘如實道來成正覺大經云從十一空來就智論來從六波羅蜜來就行論來釋論明如法相解爲如如法相說爲來今明如三諦法相解名如如三諦法相說名來故言如來也游者游涉進入之義爾夫法性者非入住出故小般若云如來者無所從來亦無所去故

名如來何得言游邪良以慈悲導物敷我而入故言游也令衆生食甘露味亦應言住爲衆生宣說亦應言出故法華云善入出住百千三昧即此義也無量甚深者將明游入顯其體高廣體包法界故言無量徹到三諦故言甚深非是二乘下地菩薩之所逮及故言無量甚深也法性者所游之法也諸佛所軌名之爲法常樂我淨不遷不變名之爲性非是二乘以盡無生智所照之理爲法性也二乘法性淺故非甚深有限故非無量今之

如實智所照之理橫包法界豎徹三諦故言無量甚深爾又無量者非別有一法名爲無量毗盧遮那徧一切處一切諸法皆是佛法皆佛法故即皆法性佛皆遊之故言無量又非別有一法名爲甚深即事而真無非實相四一一色一香莫非中道皆中道故即是甚深例如釋論解四無量心云緣東方衆生名廣緣四方名大緣四維上下名無量準此而言緣真諦法性名廣緣俗諦法性名大緣中道法性名無量若緣中道即是三智一心中緣三

諦一諦此境無量唯佛無量智乃能緣之如
函蓋相稱非二乘下地測其涯底諸佛行處
者正顯佛智無量甚深佛智無量甚深故行
處亦無量甚深行處無量甚深故佛智亦無
量甚深舉函顯蓋舉蓋顯函正在此也過諸
菩薩所行清淨者正簡也菩薩居未及之地
智之所行未能深廣故地持云菩薩得九種
禪初名自性禪若入此禪即入實相法性清
淨之境二乘不聞其名況有其行若入第九
清淨淨禪一切通別惑累若正若習皆盡故

言清淨淨禪自下地去皆有餘習佛住十地
頂若入此禪過諸菩薩淨名云心淨已度諸
禪定即此義也亦是舉其高位簡法性甚深
也是金光明下敘述序若敘正說流通十七
品意已如上說今更論敘述五重玄義初十
二行半敘名體宗用次十四行半即敘流通
弘宣此典即是敘教相也就初一句敘名次
一句敘體次三行敘宗次九行敘用護世下
去敘教相也解者或言金光明一句猶是敘
體如鑛石中金金體乃非光非明不妨約金

論內外用法性非宗非力亦依法性起於宗力當知此句正是敘體今明理乃當然分文則屬敘名也經王上已說今更述之三藏云三德攝三涅槃正斷二乘斷見般若正遣凡夫有著華嚴正化始行菩薩今經通爲八位人故稱王也此語難解涅槃爲菩薩說甚深微妙行處豈止爲二乘般若云法身佛爲法身菩薩說法其聽法衆非生死人豈止遣凡夫有著華嚴說初地乃至說十地豈止爲始行菩薩作此偏說無智之人於諸經起輕慢

此義不可今言經王者若取文爲經即是三種俗諦若取理爲經即是三種真諦若取文理合爲經即是三種中道若說餘諦是經而非王若說中道是經復是王於九種經中而得自在但經王是一隨緣設教名字不同華嚴云法身方等爲實相般若稱佛母法華爲髻珠涅槃名佛師皆是法性異名通爲諸經作體譬如諸姓應運迭興龍師鳥官隨時霸立百代雖異而統王是一法性亦爾宜聞大品佛母爲王餘名廢息宜聞法華實所爲王

餘名廢息法性爲金光明之王亦復如是若作此解上不違佛經王之旨下不增長衆生我慢微妙者他釋因微果妙今不爾因果俱微妙因中性德深而難見名爲微不縱不橫名爲妙果中修德亦復如是四方四佛護持者四方者四門也四佛者四門果上覺智也釋迦覺智與四佛同諸佛果智冥於法性法性得顯名爲法身法身不動名之爲持法性常故諸佛亦常法常佛常壽命亦常常故無量信相推迹或本四佛令其達本悟迹名之

爲護此一句種種義法性四門法性四德即體義果智顯體即宗義護念信相斷疑復是用義而敘宗爲正意 觀心解者四方是四諦四佛是四諦智東是方首如集是苦因又東甲乙是春生生即集諦也從東次南亦猶生而有長先春次夏故南方是苦諦也長後秋收又白帝屬金金能波斷西方即道諦也從秋收至冬藏衆事都息北方如滅諦苦集因果皆謝無用也觀此四諦生眼智明覺持理不失護倒不起故名護持也又觀四方是

四德觀東方常爲破無常觀無常爲破常觀
非常非無常破常無常乃至觀北方無我爲
破我亦如是此觀持德不失護倒不起故名
護持也觀東方集諦常非常非無常不動故
名阿閼觀南方苦諦樂無去無來法性實相
實相尊貴故名實相觀西方道諦畢竟清淨
法性壽命與虛空等故名無量壽觀北方滅
諦永寂爲我入秘密藏秘密藏故名微妙聲
云云我今當說下九行偈是敘用文爲四初三
行明能破之勝法次三行半明所破之惡罪

次一行半舉行法勸修次一行結成初三行
明能破勝法者謂境法法性也行法懺悔讚
歎也導法一切種智也故言懺悔等法知非
一種也若相資爲論行資智智顯理顯故
能盡衆苦苦盡故法身顯智圓故報身顯功
德無上故應身顯若圓論者三法不縱不橫
而修三身亦不縱不橫而顯雖圓別之殊俱
是能破之勝法也觀舊文語略新本具有三
周說法之文四佛說常果上根得益婆羅門
說法身無舍利中根得益佛分別三身下根

得益今敘中云我今當說懺悔等法即是敘
下三周之法能破惡也次從諸根不具下敘
述空品文爲二初三行半明所破之惡次二
行半明能破之方初又爲三諸根不具下破
報障愁憂一句破煩惱障惡星災異下破業
障餘經對緣云報障難轉因時可救果無如
何此經三障皆可轉一往釋此三障由破五
戒破五戒是業障受三塗人天等身是報障
煩惱爲根本是煩惱障今直就人道中明犯
五戒報者諸根外缺壽命內天此兩句是殺

生報昔損他身分今諸根殘毀昔斷他命今
壽損滅經云殺生因緣得二種果報多病短
命即其事也若貧窮困苦是外無依報諸天
捨離是內無福德此兩句是犯盜戒經云有
同生同名天龍輔佐之功德天發願利益之
盜人無此事也又先富後貧者必是龍棄天
捨也若親厚內闢王法外加此兩句是犯淫
戒經言人護則人瞋法護則法壞昔侵其人
今骨肉鬪訟昔毀他法今王法所加即其事
也各各忿諍此應有兩句或是翻者脫落或

是略爾內則各各忿諍外則人人不信此一雙是犯妄語昔不實欺他今常被欺忿昔語無實今人無信者外耗財物內虧禮度此是飲酒報昔慢財費日今多損耗昔乖擗節今憤聾駭經言嫌恨猛風吹罪心火常令熾然即其事也問釋大乘經何得以五戒對義答開合五戒大有所關提謂經云五戒者天地之大忌上對五星下配五岳中成五藏犯之者違天觸地自伐其身也又對五常不殺對仁不盜對義不淫對禮不飲酒對智不妄語

對信又對五經不殺對尚書不盜對春秋不淫對禮不妄語對詩不飲酒對易又對十善殺盜淫是身三妄語攝口四飲酒攝意三俗不能護口略制一不妄語釋論云說重者是妄語則已攝三飲酒是邪命自活增益恚癡出世以智慧為首生死以三毒為根若能禁酒是防止意地三毒長養出世智慧也是為開五戒出十善十善是舊法輪王所用亦名性罪性善都是一切罪之根本又五戒對五陰不殺即色陰不盜即受陰不淫即想陰不

妄語即行陰不飲酒即識陰五陰開四念處
念處開三十七品三十七品開三脫門三脫
門開涅槃故云色能發戒受禪定想慧悟
虛通行發解脫識即知見當知五戒能成五
分法身辦二乘之法也又五戒亦是大乘法
門提謂經云五戒是佩長生之符不死之印
即常德也出入無亂往還無間即淨德也統
御一身即我德也以立道根即樂德也此是
五戒對四德東五戒爲三業即對三無失三
不護三輪不思議化三密三軌三身三佛性

三般若三涅槃三智三德等無量三法門橫
豎無邊際與虛空法界等亦是無盡藏法門
亦是無量義三昧舉要言之即是一切佛法
也復次害命名事殺不害命名事不殺法門
解者析法名理殺體法名理不殺當知不殺
之戒種種不同論其果報亦復不同若作意
防護如馬著勒如牧牛執杖者報在人道百
二十年唯得肉眼無有四眼若任運性成如
河注海者報在六天極長者九百二十六億
七十萬歲唯得天眼未得三眼若加脩客戒

無常苦無我等慧者報在變易壽七百阿僧祇唯得慧眼未得二眼若加脩常無常等慧報在蓮華藏海受法性身分得五眼分得常壽比佛猶是諸根不具壽命損減況前諸根諸壽邪若圓教人持事不殺戒又持理不殺戒不壞於身而隨一相不斷癡愛起於明脫體陰界入無所毀傷若子若果不生不滅成就智慧居常寂光土常壽湛然五眼具足得根自在耳見眼聞得命自在脩短自任是則名爲究竟持戒諸根具足命不損減也又圓

教人何但持之是戒唯殺唯慈亦作事殺亦作理殺如仙豫大王殺五百婆羅門與其見佛之眼與其十劫之壽又作法門殺者析蕩累著淨諸煩惱如樹神折枝不受怨鳥如劫火燒木灰炭雙亡故央掘云我誓斷陰界入不能持不殺戒一切塵勞是如來種斷此種盡乃名爲佛成就金剛微妙法身湛然應一切唯殺唯慈垂形九道隨其所宜示長短命任其所見用鉞具根而化度之前諸戒行淺近隘塞非是通途圓戒宏遠徑異會同故名

究竟持不殺戒也不殺之戒人天已上極佛已還曠大縱橫其義如是云何而謂是小乘數耶復次不與取名事盜與取名事不盜法門解者如佛言曰他物莫取名法門不盜菩提無與者而取菩提是名法門盜不盜之戒種種不同若持戒作業求可意果可意果者無常速朽悉是他物臭如糞果害如毒食有智之人所不應求設使得之心不甘樂云何殷勤飲苦食毒而自毀傷貧窮四姓即此三界洄復困苦豈過有流三障障佛第一義天

之所捨離是名爲盜非不盜也又二乘之人以四諦智觀身受心法厭惡生死欣求涅槃涅槃心起爲自爲他爲共爲無因介爾心生即取他物即非時取證即不待說所因焦種不生見苦斷集脩道造盡非求法也謂有涅槃成涅槃見若有著空者諸佛所不度身長三百由旬而無兩翅墮三無爲坑受若死若死等苦法華云飢餓羸瘦體生瘡癬豈非貧窮困苦邪淨名云不見佛不聞法不入衆數豈非第一義天遠離邪此猶名盜非不盜也

若別教菩薩次第行次第學次第道從淺至深捨一取一來已更復來去已更復去悉是辱於來去相亦是不與而取取已而捨亦是貧窮捨已更取數數去取即是困苦不即與第一義相應即是遠離此猶名盜非不盜也圓人觀諸法實相受亦不受不受亦不受亦受亦不受亦不受非受非不受亦不受不受亦不受不取是菩提障諸願故是法平等無有高下不高故不取不下故不捨如是觀者觀如來藏具足無缺是如意珠隨意出寶即

脩羅琴任意出聲即是大富大富故無取無取故即第一義第一義故天不遠離也是名究竟持不盜戒也圓人復有盜法門菩提無與者而取菩提如海吞流不隔萬派如地荷負擔四重檐衆生悉度煩惱悉斷法門悉知佛道悉成此義可知不能多說前諸戒行淺而且塞非是通途圓戒宏遠徑異會同故名究竟持不盜戒也復次男女身會名事淫不四一會名事不淫法門解者若心染法是名爲淫不染法名爲不淫不淫之戒種種不同若關十八

禁七支如猴著鎖攀一油鉢過諸大眾割捨
觸樂求於未來淨潔五欲如市易法以銅錢
博金錢此乃增長欲事非不欲也若為生天
故持戒如羝羊相觸將前而更却帝釋共八
十億那由他天女縱逸嬉戲看東忘西欲猶
不足化為老脩羅納舍脂使諸天亡身失首
又見仙人入定汙弄其女仙從定起釋羞自
化為羝羊仙人呪之千根著身無能却者後
來懺謝變為千眼是亦增欲非不欲也若斷
欲界麤弊之欲染著色無色界禪定之樂如

冰魚蟄蟲墮長壽天是為一難貪著禪味名
為大縛是染欲法非不欲也若憎惡生死如
怨如蛇愛翫涅槃如親如寶棄之直去涉路
不迴諸有色聲不能染屈如八方風不能動
須彌若聞菩薩勝妙功德甄迦羅琴聲迦葉
起舞不能自持四十一隨嵐風至破須彌如腐草是
染欲法非不染也若菩薩惡生死如糞穢惡
涅槃如怨鳥捨於二邊志存中道起順道法
愛生名頂墮是菩薩徧陀羅既無方便此慧
被縛不能勝怨已所脩治為無慧利是染欲

法非不欲也。圓人觀一心三諦。即空即假。即中。即空何所染。即假何所淨。即中何所邊。即空即假何所中。即空故無我人。上六知見。依正等愛。即假故無空。無相願等愛。即中故無佛菩提轉法輪度衆生等愛。三諦清淨名畢。竟淨是淨。亦淨經言。唯佛一人具淨戒。餘人皆名汙戒者。圓人行於佛法。即究竟持不淫戒也。圓人又有染愛法門。如和須蜜多女人見人女。天見天女。見者得見。諸佛三昧執手者。得到佛刹三昧。歇者極愛三昧。抱者冥如。

三昧各各皆得法門。亦如魔界行不汙戒。菩薩變爲無量身。共無量天女從事。皆令發菩提心。如維摩詰。若入後宮後宮中。尊化正宮。女先以欲鉤牽。後令入佛道。斯乃非欲之欲。以欲止欲。如以屑出屑。將聲止聲。前諸行淺塞。非是通途。圓戒宏遠。徑異會同。是名究竟持不淫戒也。復次不見言見。見言不見。名事妄語。法門解者。未得謂得。未證謂證。名爲妄語。妄語多種。諸欲求時。苦得時。多怖畏失時。懷憂惱。諸欲無樂時。凡夫癡人。於下苦中橫。

生樂想豎我慢幢打自大鼓謂色即是我我
即是色色中有我我中有色執有與無闢執
無與有闢依止斷常起六十二戲論破慧眼
不見於真實增見長諸非吾我毒甚盛備口
四過略標妄語爾三十三天黃葉生死謂是
真金非想自地具細煩惱謬計涅槃此非妄
語誰是妄語邪二乘之人競執瓦礫歡喜持
出生滅度想生實未盡寧得滅度生安隱想
所作未辦寧得安隱淨名云佛為增上慢人
說離淫怒癡名為解脫其實未得一切解脫

未得謂得豈非妄語邪佛為別教人以四門
說實相執於一有隔礙三門乃至執非有非
無而隔有無夫實相者言語道斷心行處滅
云何以字字於無字云何以數數於無數豈
非妄語邪圓人如實而觀如實而說如實觀
者非內觀得是解脫非外觀非內外觀非離
內外觀亦不以無觀得是解脫如實說者一
切實一切不實一切亦實亦不實一切非實
非不實如是皆名諸法實相經言諸佛皆實
語佛語實不虛能以一妙音徧滿三千界隨

意之所至隨諸衆生類各各皆得解即是以佛道聲令一切聞也圓人亦有妄語法門無車說車誘戲童子無樂說樂止彼啼兒若有衆生因虛妄說得利益者佛亦妄說經言我是貪欲尸利我是瞋恚尸利愚癡尸利然實非也我是天是人實非天人我是龍鬼實非龍鬼將虛以出虛令得不虛爾前諸行淺近隘塞圓行深遠夷坦無礙徑異會同故能如此是名究竟持不妄語戒也復次若穀若草昏心眩亂者名事酒法門解者迷惑倒見名

之爲酒倒見多種夫酒爲不善諸惡根本能生三十六種之失招於五百世中無手慢刑失禮發出伏匿眠卧糞穢擔揆水火過患如此人猶尚之晉世引滿稱藝能魏朝清濁爲賢聖畢卓自署爲酒徒鄭泉自誓爲酒壺竹帛載之古今歌之不應作而作不應歌而歌非醉酒是何釋論云有一法師爲王說五戒罪福王難云飲酒招狂飲者甚多狂者何少邪法師舉手指諸外道而已更言餘事外道侮張云王難甚深是禿高座更不能吞王云

法師答竟狂亦不少指汝等是將護不彰爾
此即世人之醉也又貪如海納流無有滿時
瞋如火益薪展轉彌熾癡如膠黏結如冰足
水八萬塵勞煩惱其心無暫停住掣電蛇舌
颺餒獼猴五欲攪作無時不醉大經云從昔
已來常為聲色所醉流轉生死三界人天通
有此醉也若二乘之人雖斷九十八使四住
煩惱無明未吐如半瘡人大經引醉歸之人
世間無常樂而言我淨如來實我淨而言無
常樂如彼醉人見日月轉此二乘醉也菩薩

之人無明未盡不了了見菩薩行故見不了
了如遠望大船遙觀鵝鴈夜觀畫像遠視人
杭亦如醉人朦朧見道如是等無量譬喻顯
於菩薩未得明了故迦葉云自此已前我等
悉名邪見人也此菩薩醉也圓人行如來行
具煩惱性能知如來祕密之藏雖有肉眼名
為佛眼所可見者更不復見故文云入深法
性即於此典金光明中而得見我釋迦牟尼
大經云了了見佛性猶如妙德等是則五住
正習一時無有餘酒法既除何所可醉是為

究竟持不飲酒戒也圓人亦有飲酒法門篤
摧云持真空餅盛實相酒變化五道宣揚哮
吼波斯匿醉轉更多恩末利后飲佛言持戒
入于酒肆自立其志亦立他志夫得其門者
逆順俱當失其柄者操刀傷手前諸行淺近
隘塞圓行宏遠徑異會同故能如此是名究
竟醉醒無二也上觀四諦智名四佛觀五佛
云何觀觀五戒實相覺智清淨即是觀心中
見五佛也次破煩惱障指愁憂恐怖一句是
也上來諸事或約內身或約外報是報障義

便此一句專明心為煩惱障便

金光明經文句卷第一

晉釋

廿三

壅塞也筌筌且緣切取魚器也漸銜也
峻貌捷度此梵語也正云捷圖廣古猛霸
持諸侯之權也耗虛也擲祖太切洄
復洄胡潑旋流也六蟄蟲藏也歇口相就

也 船 也
目玄 焚 頤 切
昨 憤 亂 切
也 睽 倂
幻 陟 依 切
威 欺 誑 切
也 強 伯 薄 陌 切
大

永樂北藏

金光明經文句

第一六四冊

金光明經文句卷第二

盟二

隋天台智者大師說

門人灌頂錄

報障如上可解煩惱與業云何數人云數起而輕名煩惱數起而重名爲業天台師云任運常有是煩惱卒起決定心發動身口必牽來報者是業若爾惡星災異都不關心云何是業障此乃外相表業將起是業責報之相即得是業障也若煩惱業轉報未必轉若報轉業煩惱必轉通論見思煩惱皆有愁憂恐

怖別論愁憂屬見煩惱恐怖屬愛煩惱今不具記云云三破業障者從惡星災異下是也業將感報故其相前現相名表發意在此也惡星者別有客星也亦是五星二十八宿一方有七四七二十八也違其度數失其分野若熒惑亂行麻彗暴出是客星也災異者風雨雪霜乖候等是也衆邪者有三人邪鬼邪法邪是也蠱道者毒鬼也又言三毒是蠱也變怪者詭怪也謂禽獸醜惡形聲等是也惡夢者心靈潛密業現其中夢見不適意事是也

夫諸業表報不出五罪若惡星表亡身失命者殺生業相也惡星表神棄困窮者竊盜業相也惡星表親離幽厄者淫罪業相也惡星表誣枉讒謗者妄語業相也惡星表喪失財產者飲酒業相也其餘災異怪禽惡夢等隨其時節各有所表細心推詳不出五罪之報行者知解推之何須折筭鑽龜問管公明邪從當淨洗浴下二舉方法能空於惡也前業相外彰報對不久內無方法何以禳之約其三業作三德之方以事表理也洗浴臭體擬

作法身緘唇攝耳擬聽般若至心清淨擬作解脫前令洗浴內身後更勸淨外服內外相成爾前但令聽後誠令專聽鄭重緘口爾前令至心後示至心之境成其方法爾夫人身本於不淨蓮華本於淤泥譬如栴檀生于伊蘭世間現見也今近因三業規矩遠成三德妙義可不信哉洗浴法身能禳報障攝耳緘口能禳煩惱障至心能禳業障云云從是經威德下四結成也能悉消除者明三障轉也今其寂滅者三德成也寂滅祇是涅槃涅槃祇

是三德前三業方法既成三障理數應轉三障既其已轉理數成於三德報障轉成法身德煩惱障轉成般若德業障轉成解脫德前寄事相將淺以表深後明寂滅將深以結淺經文繡密見之者寡云云護世四王下敘流通中品皆如上說

釋壽量品

佛本無身無壽亦無於量隨順世間而論三身亦隨順世間而論三壽量法身者師軌法性還以法性爲身此身非色質亦非心智非

陰界入之所攝持彊指法性爲法身爾法性壽者非報得命根亦無連持彊指不遷不變名之爲壽此壽非長量亦非短量無延無促彊指法界同虛空量此即非身之身無壽之壽不量之量也報身者修行之所感也法華二云久脩業所得涅槃三云大般涅槃脩道得故如如智照如如境菩提智慧與法性相應相冥相應者如函蓋相應也相冥者如水乳相冥也法身非身非不身智既應冥亦非身非不身彊名此智爲報身也法壽非常非無常

智既應冥亦非常非無常彊名常爲壽也法
既非量非無量智既應冥亦非量非無量彊
名無量爲量也應身者應同物身爲身也應
同連持爲壽也應同長短爲量也智與體冥
能起大用如水銀和真金能塗諸色像功德
和法身處處應現往能爲身爲非身能爲常
壽爲無常壽能爲無量能爲有量有量有二
義一爲無量之量二爲有量之量如七百阿
僧祇及八十等是有量之量如山斤海滴實
有齊限凡夫所不知阿彌陀實有期限人天

莫數此是有量之無量應佛皆爲兩量逐物
隨緣參差長短然此三身三壽三量不可並
別一異則乖法體即一而三即三而一乃會
玄文故下文云如深法性即於此典金光明
中而得見我釋迦牟尼即其義也但信相偏
疑應身之有量四佛偏舉應佛之無量斷其
有量迹疑既除深達報法若從信相所疑應
言壽有量若從四佛釋疑應言壽無量而今
不道壽有量不道壽無量直言壽量者意欲
圓論三佛之壽量故不偏題取意爲釋若從

義便正是報身之壽量何故取此報身上冥
下應上冥法性即非量非無量下應機緣能
量能無量量疑牽無量之荅即達於圓經家
從其生圓解而題品舉一而蔽諸從此義故
題爲壽量品又一時重解壽量品亦作三重
一玄義二引證三還源玄義者壽者命也謂
報得命根連持不斷名之爲壽延促期數名
之爲量故言壽量也此釋應佛因緣之壽量
也又壽者受也境智和合共相盛受謂無分
別智盛受無分別境無分別境盛受無分別

智如函大蓋大故壽是受義也量者相應也
境智相應故言量此釋報佛之壽量也又壽
者久也常不變易稱之爲久量者銓量也常
久之壽非多數非少數非相應盡知非相應
不盡知非可說非不可說無以名之彊以銓
量說其長久此釋法身之壽量也初番爲二
一有量量如釋迦之壽方八十是也二量無
量如彌陀之壽實是有量人天所不能測故
言量無量也此量無量皆應佛所爲也第二
番亦二義佛以如如智稱如如境境無分別

智亦無分別若境稱於智智有分別境亦有分別此知與不知皆報佛所明也第三番亦二義一者深寂不可說二以慈悲方便亦可得說此可說不可說皆法佛之法也二引證者方八十年證有量也諸天世人八部之衆無能思筭山斤海滴不可數知此證量無量也虛空分界不可齊限證境無分別也又唯除如來證智可分別也又下文去智淵無邊法水具足亦是證智也壽不可計此證不可說也將欲宣暢釋迦如來所得壽命此證慈

悲可說也又聞是四佛宣說如來壽命無量證大悲可說也新本明婆羅門求佛舍利如粟大求六天報即證有量也王子說金光明難思難解福報無邊福報無邊是證量無量難思難解即總證智境不可說等云云三還源者亦云復宗釋此壽量雖作三身六義勿作異解祇是經題金光明義爾初番量無量者祇是明義以其明故大小長短延促數量悉現明中還是明義爾第二番智境函蓋體解相應色大故般若亦大以法常故諸佛亦常

還是光義也第三番可說不可說常樂我淨
說滿法界法性無所益都無一言法性無所
損還是金義夫解一則千從迷一則萬惑即
此義也既是兩時之聞兼而錄之云云此品正
說而序文未盡分別如上從王舍城下是第
三疑念序文爲二一出人二明疑出人爲四
一出處二明位三出名四歎德處如文菩薩
者著名道薩名心自行此道復能化人故言
摩訶薩依勝行立勝位也信相者信家之相
在似道中別判三十心圓判鐵輪位下文云

見有一人似婆羅門以枹擊鼓鼓是法身擊
是機動似位機興知非真擊又真似之位地
地相隨無位不有如普賢修普賢行滿位鄰
尊極此似則高信相稱似道者未敢判其高
下也難者言若同普賢言似者何故有疑此
亦非妨菩薩爲疑者作發起人爾又佛地未
了疑無所嫌法華中補處彌勒亦復懷疑大
集中有生疑菩薩於菩提未了菩提爲我作
名名爲生疑難者言見諦已斷疑十地云何
疑答言見諦斷通疑十地有別疑也觀解者

心王名王五陰名舍觀此五陰空寂空寂即
涅槃涅槃能防非禦敵呼之為城初心後心
常觀涅槃行道故是住處也歎德文為二外
供養佛內種善根此菩薩植善既深多值諸
佛作高位解釋亦應無媿色云云供養有二義
一財供養可解二法供養佛說百千法門隨
而脩學名法供養觀心解者一念覺了心名
為佛無量功德心資此覺心令轉明淨名供
養佛如膏資火如食益身如禪發慧皆供養
義也種善根者法性名地觀法性智名種子

常以觀觀名下種久習不退名種久五善根
生名增長增長由風動日照雨潤漸增茂好
風譬佛身輪日譬佛意輪雨譬佛口輪值佛
三事能大利益楞嚴般若若增法性轉顯法
性若顯定慧倍明植種值佛二義相成舉此
一雙歎菩薩德也從是信相下正明疑念序
又為二初疑之由次正生疑由有遠近遠由
三月唱入涅槃近由敘述若有聞者則能思
惟無上之義又云由乎本誓擊動生疑何因
何緣者通論三種皆名因而此文既略緣了

相資共能顯正正當於因緣了當緣正因常
恒壽命無量緣能顯理境常智亦常此因此
緣皆非八十之因緣今方八十是何因何緣
是故生疑也方八十者世壽有三品下方四
十中方八十上方百二十下方少天上方太
老中方不少不老表常又十二因緣第八名
愛支八十滅者表愛已盡入有餘無餘涅槃
愛盡無縛表我涅槃表樂又中方表中道佛
樂中道中道表淨爲此義故方八十年也信
相不作此解是故生疑何因何緣也從復更

念言下是正生疑如佛所說者此執教疑理
教詮止行二善感壽則長佛昔行因甚多而
今果壽極少理教相違不能不惑若無此理
教爲虛設若其必然長壽安在是爲執理而
惑教也有二因緣者與前爲異前合止行同
是緣了今就止行自作因緣十善中一一善
皆具止行不殺是止善放生是行善不盜是
止善施食是行善今經舉不殺家之止善不
盜家之行善互舉一邊共明止行若備論者
一一皆有止行止之與行須明也今就一一

各有因緣夫命是衆生之所共惜奪而害之
居然大苦宥而放之則爲快樂慈心是因不
畜殺具是緣此是止善因緣也夫食是依報
得之則命存失之則壽殞施心是因施具是
緣此行善因緣也不殺一條既爾乃至不邪
見亦復如是總有止行二十善四十因緣此
等因緣俱感長壽佛之止行二善累高於山
積厚於地云何今日八十而終此約因果一
途論止行二善但作此解於義未允今當更
說人天之因以五戒十善名之爲命三乘行

人以智慧爲命魔名殺者若遮奪此事即是
斷人天命若不遮奪名爲止善方便勸修名
爲行善若破壞三藏法名殺二乘人命若不
毀傷名爲止善方便勸修名爲行善若毀訾
事擅乃至毀訾世智名斷六度菩薩命若不
障礙名爲止善方便勸脩名爲行善若脩體
法斷貪恚癡是二乘命若障不令脩名斷二
乘命若不障者名爲止善方便勸脩名爲行
善非撥體空則斷通教菩薩命若不障者即
是止善方便勸脩即是行善若毀訾漸次是

斷刻孝菩薩命不作障礙即是止善方便勸
脩即是行善若誹謗圓融即斷圓教菩薩命
亦斷佛命若不留難即是止善方便勸脩即
是行善圓人非但不壞諸法而隨一相即殺
諸法而隨一相如仙豫大王害五百之短命
施十劫之長齡如佛斷一切煩惱及習一切
無有餘此皆言逆而理順非小行者所行如
上所論一一法皆有止行二善一一善皆有
因緣若得此意歷諸法門浩然若海故大經
云行檀波羅蜜得壽命長菩薩行檀則施衆

生無量壽命乃至行般若得壽命長菩薩行
般若則施衆生無量壽命即其義也而我世
尊行無不圓果無不滿云何今日方八十年
次明施食者百味甘漿等依報食也身肉骨
髓者正報食也此皆事中施食爾經言法食
法食者世間法味出世間法味出世間上上
法味菩薩能爲一切衆生作大施主令未發
心者迴邪入正已入正者增長萌芽如陰陽
養卉如父母鞠子多積繒繡令墮地不痛授
以五戒十善已持五戒者說三界火猛多所

燒害讚歎三乘無繫解脫已入證者毀訾小
乘敗種焦穀讚歎菩薩所行之道設飢國
人
大王之膳煩惱爲薪智慧爲火以是因緣成
涅槃食令諸弟子皆悉甘嗜如是等一切法
門悉名法食一一法皆具止行二善一一善
具因具緣此諸因緣感長壽果而我世尊行
無不圓果無不滿云何今日方八十年觀心
不殺者無明爲父貪愛爲母若斷此者即成
逆害但觀無明即是明愛即是淨體達能所
皆如虛空是爲止善觀諸心數亦復如是是

名行善能如是觀獲得金剛常住之壽也已
身骨髓血肉者此彼相望此爲己身智慧推
之非己身也如王子飼虎尸毗貿鴿皆捨父
母遺體非捨己身己身者法性實相是也釋
論云持戒爲皮禪定爲血智慧爲骨微妙善
心爲髓爲他世二說戒能遮罪脩福無相最上
非持非犯尸波羅蜜者是施已皮也說諸禪
定神通變化不起滅定現諸威儀者是施已
血也說無著妙慧非智非愚亡泯清淨終日
說終日無說其所說法皆悉到於一切智地

者是施已骨也檀忍等應是肉也說甚深法性諸佛行處不一不二言語道斷心行處滅微妙中道者是施已髓也將此充足飢餓衆生況餘飲食餘飲食者即是人天二乘戒皮定血慧骨真諦之髓爾法華云於餘深法中示教利喜者即其義也如來往昔隨他意說無量無邊隨自意說亦無量無邊皆是長壽因緣云何今日方八十歲也從大士如是至心念佛思是義時此一句結前開後至心者徹到心源盡心實際故言至心觀心既然觀

佛亦爾故言念佛念佛不殺施食與法性虛空等如此之壽不應短也是爲結前開後者由作此觀機動瑞興故言開後也從其室自然下是第四現瑞序瑞者密報相者表發密報四佛當臨此室爲爾斷疑表發增進常因感得常果也四二同佛作此瑞信相十一福作答信相無機佛亦不應若無諸佛機無所扣機應相須瑞以之興問衆緣感瑞信相獨感答通由衆緣別在信相若瑞在靈山可非其力室中所見豈不由之譬張家降瑞寧得王家受福

雖然信相是發起之人無容獨善法華云如爲一人衆多亦然就文爲二一現相由二正現相取結前開後之文爲現瑞之由從其室自然下爲正現相也正現相又二一別現相二總現相從其室自然下是別現相從舉要言之下是總現相別相爲十表十地因成也總相爲一表因成一果也又別相表地地各各增益總相表一地具諸地功德也問此經常果爲宗何得作相表因答此因是果家之因因必成果不乖宗也問前判信相是似位

後相則非其徵若似同普賢前相亦非其兆答一往云十地一地之中皆有諸地功德表報利益前後皆需也經家不定判位祇可從容不得尅斷也別相有十者一其室廣博二其地寶嚴三妙香氣氤四高座涌出五佛坐華座六放大光明七雨諸天華八作天妓樂九皆受天樂十根缺者具此之十相表報十地功德止可斐亶擬議不得責其備悉其室自然廣博表初歡喜者此地初開過於凡聖故以廣博表之嚴淨瑠璃間錯表離垢地者

此地對戒戒是諸行基壇諸行莊嚴於戒故以間錯表之香氣表明地者其地對忍唯辱而忍增如烟多則香盛故以香表之高座表炎地者其地對精進精進督出衆行故以高座表之佛坐其上表難勝者其地對禪禪有神通轉變大力故以佛表之光明表現前者其地對般若般若洞照故以光明表之天華表遠行者其地對方便方便善巧觸處嚴淨故以天華表之作樂表不動者其地對力力能利安一切如妓悅物故以作妓表之受樂

表善慧者其地對願願滿則心喜故以受樂表之根具表法雲者其地對智因中衆行故智慧爲首智導諸行隨階而圓故以根具表之云云復次十相表一一地中具諸功德且約初地釋之其室自然廣博嚴事者此相表初地智也室者以五陰爲室此陰非陰亦非非陰不爲陰非陰所作亦不作陰非陰故言自然不得陰不得非陰二邊虛豁故言廣博非直空無二十五有二種涅槃亦有因中十力無畏種種功德而莊飾之故言嚴事嚴事即

假智廣博即空智自然即中智三智一心中具足是故歡喜天紺瑠璃雜廁間錯以成其地者此相表初地所照境天紺瑠璃瑩淨明徹表真諦境雜廁間錯種種莊嚴表俗諦境猶如如來所居淨土至聖所居極尊之地表

世二

十三

中道第一義諦境一地而三相三相而一地表一諦而三諦三諦而一諦有妙香氣過諸天香者此相表初地慈悲功德慈能與樂如香氣氤悲能拔苦如香離臭此慈悲豎高故言過諸天香此慈悲橫闊故言徧滿徧滿一

切陰界入中無不溥覆也其室四面有四高座者此相表初地四德四德是秘密之藏佛住其中如高座可坐為坐諸佛也有四如來者此相表初地覺四德智智與德冥如佛坐座也放大光明者此相表初地自行化他照此土表自行照他土表化他也雨諸天華者此相表初地四辯華雨於空如辯詮於理也作天妓樂者此相表初地四攝攝物如樂樂他也受天伎樂者此相表初地法喜法喜澄神如受天樂根缺具足者此相表初地

諸根互用耳見眼聞一振之中具足諸根之用也初地功德佛辯所不能宣略舉十相表其梗槩爾初地既然一一地亦復如是復次十相表初地自行化他功德前五相表自行功德後五相表化他功德其室廣博表自行之般若天紺瑠璃表自行之法身有妙香氣表自行之解脫高座華衣表自行之因成佛坐座上表獲記成佛也後五相表化他功德者放光表意輪益物也雨華表口輪益物也作樂表身輪益物也又衣能令衆生轉煩惱

障而受法喜之樂根具表能令衆生轉報障也初地既然後一一地亦復如是從一切世間下是總現相也別相文廣意略總相文略意廣此表十地因成一果究竟具足也一切者該十法界也世間者包三世間也未曾有者因中所無也悉具現者因圓理顯也國土世間未曾有則實相滿衆生世間未曾有則般若滿五陰世間未曾有則解脫滿舉要者實相是要實相既圓何法不滿邪從信相歡喜下是第五默念騰疑序文爲二初見相歡

喜二默念陳疑歡喜者既因心疑觀瑞見佛必知聞法是故歡喜從至心念佛下是默念求決也夫疑情不可久處是故騰疑念釋迦如來無量功德相好光明神力說法皆不生疑唯壽命中心生疑惑云何佛壽中八十年念此覆心故默騰求決也而不發言者四佛適現威尊敬重不敢發言疑既覆心不得不念又前默念而感瑞今承前默念以求決爾從爾時四佛以正徧知下是第六止疑序文爲二一正止疑二釋止疑疑蓋覆心聞法不

解故先止之例如見諦先斷疑方進脩道也若信相實疑宜須折止若是起教因其訓人從汝今不應下正止疑也云何不應有三不應一大用不應八十者是佛大用是故不應二法性海深非言思所測三以信能入以智十五能度汝信智未具豈度量所思釋論云無量法欲量是人爲覆溺故將不應而止之也何以故下釋三不應之意舉八衆皆不能量者釋法性不應也法身菩薩法性淨土故不在言生身菩薩若在家爲天龍等所攝若出家

爲四衆所攝若法性身施權亦爲八衆所攝
若凡若聖悉不能思筭也唯除如來者釋智
度不應也若如如是則能知既未如如來
那忽能知舊用此語爲智所知知是無常可
量之法天台師云不爾如來有無量常智能
知無量常法豈可以常智所知判爲無常邪
智性既冥火用可解是釋三不應也從時四
如來下是第七集衆序餘經或先集衆後現
瑞此經先現瑞後集衆前後互出爾時者將
欲宣暢之時也衆者欲色界諸天也信相一

人利益者少有緣若集所益處多是故集衆
衆有四種一發起衆信相樹神等是也二當
機衆聞即得道者是也三影響衆從十方遠
來者是也四結緣衆當座雖未得道作後世
因緣者是也如流水爲魚說法遠作今日得
悟因緣即其事也此經集天龍衆與華嚴意
同亦集人衆而文略新本中有無量百千婆
羅門衆懺悔品初信相及眷屬詣耆闍崛山
即是人衆也相承云此經與冥道相關正集
天龍略不說人爾總瑞中云一切世間未曾

有事悉具出現不見與二乘記但明常辨性
與般若方等意同故判屬方等教攝此中應
論乘戒緩急四句判出天龍生處得道不得
道權實等事如別記云云齊此判屬序段者文
云將欲宣暢大衆雲集豈非序之明證邪序
分竟從爾時四二四佛下三品半文是第二正說
段凡三說不同一云壽量明常果爲宗常果
契性性即是體二義宛然不須多惑下懺悔
品滅惡讚歎品生善空品導成即是經用也
二云壽量明宗懺歎明用空品明體此乃以

因中所用之性爲果上所顯之體於義不便
故不用之三三藏云正說有兩段壽量是果
段三身是因段二文各有序虛空藏問爲因
段序直是發問於序義弱師云三身成果上
義非因義也是故不用初家所說好與今意
同新舊兩文凡三處明宗初是四佛拂疑明
應化之壽非思筭所知迹既長遠本難窮極
上根人聞迹悟本也若未悟者王子明蚊蚋
脚可以作城樓鼠登兔角梯食月除脩羅明
法身無舍利如來真實身舍利無是處中根

人直聞理本而悟迹也若未悟者釋迦論三身共說廣分別之本迹俱解是爲三番明宗顯體懺品別論滅惡通亦生善歎品別論生善通亦滅惡空品導成俱是經用也今之四卷止有一番明宗文爲四初四佛說偈二信相歡喜三當機得道四四佛還本說偈又二一經家敘二四佛喻說問四佛說偈爲各爲共吞經既無文不可定判或宜聞共說異口同音或宜聞別說各引一喻見亦如是若見四佛同尊特身一身一智慧者即是常身弟

子衆一故若見四佛佛身不同即是應化弟子衆多故分八偈爲二意初云前四偈立譬次一偈合譬次二偈斷疑次一偈結釋次云前四偈爲譬本後四偈合釋兩途俱可用舊云四偈止譬其壽長更無別意是義不然諸佛之教上中下善其言巧妙其義深遠此中正是常宗斷疑一經之要處何容無義且作三意消文一對四諦二對四念處三對四德四諦理通因果四念論因四德論果若論果壽宜對四德果不孤起故念處明因因果有

本故對四諦也上以四佛對四諦智今以四佛所說對四諦理舊讀四諦文云知苦如苦相知集如集相相是其事齊事而知於理不顯今明知苦如苦相如是其理相是其事即事而真事理雙達餘三諦亦如是如是釋者於四諦理義便也又一解知苦是知俗如是知真相是知中中是實相故今以相爲中也此則三諦具在一文知苦既然下集道滅亦如是云云明識四諦是脩長壽境故約四諦對偈也一切諸水者此對集諦大經云有河洄

腹沒衆生即其義也水體潤生如集能資長鼓怒浩漭無處不有集亦如是沒溺凡聖且界內外也諸須彌山者此對苦諦小般若以身爲須彌即其義也山體結構磐峙水上如苦報積聚爲集作果繫縛界內外色心也大地微塵者此對道諦法華云其所說法皆悉四二到於一切智地即其義也地體能容載水陸兩途如通別道到此彼岸虛空分界者此對滅諦法華云常寂滅相終歸於空即其義也空體盡淨五翳所不能染三光所不能淨如十八

滅諦滅無二十五有及滅化城涅槃也四諦理徧一切處即法身四諦智稱境而知即報身從體起用同其長短即應身信相但見應短不見應長應尚不達寧知報法四佛舉四喻喻其應長水滴山斤地塵空界尚無能思算得其邊表況復智冥於法淵哉玄哉信無底際曠矣大矣豈有垠涯舉應迹以釋報法豁然明悟斷疑之巧爲若此也釋此偈妙爲若此也行者思之思之四偈對四念處者念處之觀本在苦諦唯應約須彌山偈而論今

則通對也一切諸水對受念處受能含納如海多容故也須彌山對身念處色相與質礙相類故也大地對於想行念處想取行行如地容載故也空界對心念處心但有名如空無相故也若觀四念處是脩長壽四二因若念處得道即是長壽果故用念處對四偈也若觀四枯念處破凡夫之四倒若觀四榮念處破二乘之四倒若觀中道念處則非榮非枯於其中間而般涅槃成五種解脫謂色解脫乃至識解脫脫五陰縛名五解脫洞達五陰空

無所有名五般若冥五陰理名五法身雖三分別不一不異不縱不橫名祕密藏號大涅槃仁王呼爲法性色法性受想行識陰之法性即是法身智冥法性即是報身法報皆非常非無常而能起用爲常爲無常常用則長無常用則短信相但見無常不能見常於用未達況解其本四佛舉喻明其用常迹常無邊非思筭所得況復體理寧可心知信相迷除豁如雲卷斷疑之巧爲若此也四偈對四德者水潤生榮對常德山能高出對我德碎

地爲塵對淨德空無苦受對樂德四德成就是果上所尅果與理冥冥於非常非無常能起常無常用冥於非我非無我起我無我用冥於非淨非不淨起淨不淨用冥於非樂非不樂起於樂無樂用信相但見無常無樂不見常樂於應尚迷何能識本四佛舉四德之用非思筭所知體本報法杳然慮外信相聞說非但疑除惑斷增信生解故歡喜踴躍得之於懷云云億百千萬下合譬偈也舊解有二失一僻取文二偏執義舊云四譬皆有齊畔

可盡之物百千是數法數必有窮據此爲無
常今釋不爾四佛引四譬者乃是舉量以況
無量量物尚非思筭所知無量之法寧可圖
度億百千萬此舉數法以明無數汝既不能
數數那能知無數縱令知數知無數知量知
無量者祇是化用都不關體本僻取之失非
但自毀又亦誣經偏執義者三身品云化身
亦常處處說法是故爲常當知化身備有常
無常義舊人那忽一向無常云云以是因緣下
兩行斷疑偈也若作因緣者因親緣疎命是

正報不殺爲因食是依報施之爲緣以此因
緣得壽命長若作二緣者不殺是不殺戒家
止善施食是不盜戒家行善互舉止行俱是
二緣法性菩提心名之爲因止行福慧等併
皆是緣緣能顯性會非常非無常能常能無
常法食不殺等皆如上說脩因既長得果又
長顯體又長起用又長破其短疑也是故汝
今下一偈結成也爾時信相下聞偈斷疑生
信也聞壽命無量者解迹中之能常其壽無
量也疑去者解迹中之能短其壽八十也深

心信解者悟其本識非量非無量也踊躍者
登位也歡喜者信生也別教釋者信相似位
中疑惑去登歡喜地中信生也圓教釋者信
相鐵輪位中疑惑去入住銅輪位中歡喜也
若作普賢似位釋者下地中疑惑去十地頂
深信堅固猶若金剛鄰真接極而生歡喜也
從說是如來下是第三當機上根初悟也從
時四如來下第四息化也佛本為緣興緣已
利益則攝化還本故言忽然不現也觀解者
諦境發智覺慧相應深觀此慧亦不得慧亦

不見境境智俱寂即是不現義也云云

金光明經文句卷第二

音釋

抱房九切擊禦牛據切訾將此切誹謗
尾切非議也謗居六切飼祥吏切貿莫
補曠切毀也鞠育也斐妃尾切齏武
也易鵠古合切斐妃尾切齏武
蒲官切峙丈里切垠魚巾切
盤屈也峙屹立也垠界也

金光明經文句卷第三

盟三

隋天台智者大師說

門人灌頂錄

釋懺悔品

諸大乘經多分散明懺悔此經專以懺悔當
盟三
品今先釋名懺者首也悔者伏也如世人得
罪於王伏款順從不敢違逆不逆為伏順從
為首行人亦爾伏三寶足下正順道理不敢
作非故名懺悔又懺名白法悔名黑法黑法
須悔而勿作白法須企而尚之取捨合論故

言懺悔又懺名修來悔名改往往日所作惡
不善法鄙而惡之故名為悔往日所棄一切
善法今日已去誓願勤修故名為懺棄往求
來故名懺悔又懺名披陳眾失發露過咎不
敢隱諱悔名斷相續心厭悔捨離能作所作
合棄故言懺悔又懺者名慙悔者名愧慙則
慙天愧則愧人人見其顯天見其冥冥細顯
麤麤細皆惡故言懺悔又人是賢人天是聖
人不逮賢聖之流是故懺悔又賢聖俱是人
天是第一義天第一義天是理賢聖是事不

逮事理俱皆懺悔又慙三乘之聖天愧三乘之賢人不逮此天人故名懺愧懺愧名懺悔又三乘賢聖皆是人第一義理爲天約此人天懺愧故名懺悔又三乘賢聖尚非菩薩之賢況菩薩之聖今懺愧三十心之賢十地之聖故名懺愧懺悔總此賢聖皆是人第一義理名爲天約此人天論懺愧故名懺悔又三十心去自判聖人十信是賢人約此賢聖論懺愧懺悔總此賢聖皆名人第一義理名爲天約此人天論懺愧懺悔合十番釋名也次

明懺悔處者大經闇王偈云麤言及軟語皆歸第一義是故我今日歸依於世尊又梵行品云我昔與汝等不見四真諦是故久流轉生死大苦海若能見四諦則得斷生死生死既盡已則不受諸有法華云行處近處住忍辱地亦不行不分別又云寶處在近汝可前進即滅化城即至寶所此經云我當爲是作歸依處歸依處者即甚深無量法性也法性祇是諦理諦理祇是妙境諸佛所師寂滅真如祕密之藏十方衆聖安住其中若得其本

本立則道生不得其處則平地顛墜如盲人入棘林動轉罣礙爲是義故須識懺悔處也故普賢觀云端坐念實相衆罪如霜露慧日能消除我心自空罪福無主是名大懺悔是名莊嚴懺悔是名無罪相懺悔無罪相者此約空爲處也莊嚴懺悔者約俗諦爲處也大懺悔者約中道爲處也若三種差別者此是歷別論處爾即一而三即三而一者此圓妙懺悔也諸大菩薩修學佛法而懺悔也若識此法而懺悔者最妙最上懺悔處也大經云

譬如有人在大海浴當知是人已用一切諸河之水大品云譬如負債人依投於王債主反更供養何敢就其覓物書云如牆頭草非其莖葉能高能長所依得處也行人若依法性爲懺悔處者高出一切諸處所也行人若識此意先當求覓法性道理爲懺悔處也次明懺悔法者法爲二種一正法二助法正法者即是觀法性之慧也法性常故是觀亦常法性樂我淨故觀慧亦爾法性不可思議至深至妙無上無等等者觀慧亦爾境智相冥

無二之法如如不異者境如智智如境故言如如不異也經言說智及智處皆名為般若說智及智處皆名為寶相說如不說不說如說說不說無二無別以此觀慧歷一切法亦復如是故云毗盧遮那徧一切處若行若住若明若闇皆得不離見佛世尊六根所對無非佛法者婆攬草無非藥者普能愈病釋摩男所執一切砂礫皆變為寶阿那律空器悉滿甘露若如是者所觀之罪非復是罪罪即實相所觀之福福即非福福即實相純是實

相是名大懺悔也助道懺悔者若純用正懺亦不須助若正道闇昧不明了者修助以助之所謂灰汁澡豆阜茨木櫨以助清水爾略言勤用身口意而為助也身謂旋禮口謂讀誦心謂策觀而助開門如順流順風助之以篙棹去則疾也如是略論正助也四明懺悔位者若作一種解者謂鄙濁凡夫應須懺悔離垢清淨者何用懺悔此不如是故新本業障滅品中說人從父母稟身十月懷抱三年鞠養撫念惟惟始能升頭戴髮教方教數始

解作人那忽違恩背義而行殺逆天雖大不
覆此人地雖厚不載此人此人命終直入地
獄如是逆罪應須懺悔滅除業障佛爲人天
師師嚴道尊凡有所說若有違犯罪莫大焉
初篇後聚那可違負爾則欺佛負心復負三
師七僧此則佛海死屍華園爛肉此四重人
應須懺悔滅除業障多瞋墮蛇虺多欲墮鳩
鵒多癡墮蟲蟻多慢墮飛鳥多諂墮修羅多
慳墮餓鬼餓鬼常飢渴畜生相殘害修羅多
怖畏是四惡道聞名尚不可況復當之應須

懺悔滅除業障人中八苦一苦尚不可忍況
八苦交橫應當懺悔滅除業障天上有五哀
地獄等苦色界天不得速入定求不得苦無
色界天有四心苦三界籠樊生死窟宅應須
懺悔滅除業障若出家人雖欲脩道爲五煩
惱所障心不得停心爲四顛倒所惑不得入
四念處亦須懺悔滅除業障念處治彼四倒
二惡不勤斷二善不勤生不得入如意足煖
法不發亦須懺悔五根不生喜有退墮根生
未有力雖有力未鄰真如是四善根中應須

懺悔滅除業障苦忍明發雖不墮三途欲界
七生次第應受一生尚苦何況七生雖斷欲
界五下分六品餘三品在亦應懺悔雖斷五
下八品盡餘一品在雖斷色盡餘無色分在
亦須懺悔雖入有餘涅槃猶有果身在身子
風熱畢陵伽眼痛欲棄有餘入無餘亦須懺
悔雖斷三界正使盡習氣尚存亦須懺悔支
佛亦爾亦須懺悔若乾慧地未得理水露心
故言乾慧性地未能見理八人見地猶有愛
惑薄地神通未能還生欲界離欲地猶有上

界惑已辦地不能除習辟支佛地但作神通
不能達文字菩薩地未窮至極如是等位皆
須懺悔滅除業障十信但信未能稱理十住
但入偏理十行但事未能入中十迴向但修
中未能證中十地雖證中地地皆有障未窮
於學不得無學應須懺悔滅除業障又十信
雖三智圓脩但是方便陀羅尼十住已去乃
至等覺已來祇如十四日月非十五日月匡
郭未圓光未頓足闇未頓盡應須懺悔滅除
業障齊此已來當知懺悔位長其義極廣云

何而言止齊凡夫是故五十校計經齊至等
覺皆令懺悔即其義也若人得聞如此懺悔
功德不少故文云非於一佛五佛十佛修諸
功德聞是懺悔乃於無量百千佛所修諸功
德聞是懺悔語其華報在在處處常爲國王
輔相大臣之所恭敬語其果報常爲十方諸
佛互相恭敬直聞此懺悔尚得如此功德況
復如法修行已聞懺悔義此法從經出此經
從佛說是故當報恩歸命禮諸佛云懺悔品
依字訓釋懺者鑑也披陳發舒已之三業不

敢隱諱令他委鑑顏慙而口蹙心摧而意伏
身被鑑故而顏慙口被鑑故而脣蹙心被鑑
故而意伏故懺名鑑也悔者廢也內懷鄙恥
悔造衆非悔身故則三廢悔口故則四廢悔
心故則十廢故悔名廢也又法門釋者懺悔
名懺愧懺愧是白法四三又自不作惡六不教他作
惡如是等種種說懺悔有三一作法二取相
三無生此三種通大小小乘作法者如毗尼
中發露與學二十僧行摩那埵或半月作法
或對首作法或責心但今作法成就不障僧

事即清淨也阿含中亦作相懺犯欲人作毒蛇口想此觀成時姪罪即滅亦有觀空懺祇是真空大乘中亦有作法或八百日虛空藏塗廁是也或九十日般舟是也或四十九日大悲懺是也或二十一日法華是也或七日方等是也灰湯澡豆淨身辛酒禁口慙愧勤心旋誦各有徧數等皆作法懺攝也取相懺者如方等求十二夢王菩薩戒見華光摩頂虛空藏中唱聲印臂相起罪滅雖不正明作法兼得事用也無生懺者如普賢觀云端坐

念實相如日照霜露觀空緣理無相最上雖不正作事相兼上兩懺也作法懺成違無作罪滅而性罪不除如犯殺生作法懺成違無作罪去而償命猶在即其義也取相懺能滅性罪性罪去違無作罪亦去如伐樹枝葉萎四三根本未去續生如故也觀無生懺七能滅無明如覆大地根枝葉等悉盡無餘又作法滅違戒上罪取相滅犯定上罪無生滅犯慧上罪又作法滅三惡道報障取相滅人道報障無主滅三界有漏報障又作法滅三惡道業障

取相滅人道業障無生滅三界有漏業障又作法滅怖畏憂愁之煩惱亦是破煩惱取相滅四住之煩惱無生滅無明之煩惱又三種懺共除報障取相除業障無生除煩惱障又作法懺如服薑桂差病而已不能肥身譬罪滅不能生善取相懺如服五石病差身充不能得道無生懺如服五芝病除身飛升仙得道如是等種種分別行者須知今文具有大乘三懺著淨潔衣專聽是經又七日七夜朝暮淨心等即作法也於其坐處得見彌勒文

殊普賢即取相也五陰舍宅觀悉空寂本無有生亦無和合即無生也三意宛然故能滅諸惡蕩三障顯經力用也從此品下明經力用今品正明夜夢晝說懺悔斷惡拔苦下品正明昔歎發誓生善與樂旁正互舉此品文爲二初夢中見聞二覺已說見聞夢又二一夢見金鼓二夢擊鼓聲見鼓又三一正見鼓二見鼓光三見光中佛夢者是入如夢三昧也又入觀如夢出觀如覺入觀心靜能觀法性法性即金鼓金鼓體圓空鳴圓即法身空

即般若鳴即解脫殊者勝義深義大者廣義
無量義如上文遊於無量甚深法性意爾殊
大略敘鼓體委論應言圓殊大空殊大鳴殊
大鼓體備三種三種皆甚深無量此即夢中
所觀法身觀一而見三佛也從其明溥照下
是第二見鼓光也光是智慧契此法性克成
大果智與體冥體圓殊大光圓亦殊大體空
殊大光空亦殊大體鳴既殊大光鳴亦殊大
何者此身與諸佛同體同意故也此即夢中
所觀報身佛一佛而三也從復於光中見千

方佛下是第三見光中諸佛也光從鼓出徧
照十方用從體起應周法界與機緣同事也
瑠璃座者所安之理也佛坐其上智稱法性
也大衆圍繞者所應之機也此即夢中所觀
應佛即一而論三也觀此三佛即是三身三
德種種三法門從此設教名金光明也從見
有一人下是第二夢見擊鼓文爲三一見擊
鼓二出大音聲三聲所詮辯鼓是法身擊是
機智婆羅門是淨行似是鄰真鄰真之人以
似解之淨智和會法身甘露相應滅苦生樂

鼓是法身枹鼓合是報身擊出是應身聲所詮辯是法界大用起教利益衆生從時信相菩薩下是第二覺已說見聞文爲四一往佛所二與緣俱三伸敬四述夢夢者入法門爲夜夢出法門如過夜至旦又三十心惑障未遣故如夢登地三斷惑如過夜至旦觀解者觀行位中所觀三身如夢分真位中所觀三身如旦出王舍城者表出因位也往者闍崛山者表向果地也伸敬有三頂禮是身敬瞻仰是意敬說夢是口敬頂禮者菩薩居因信首

爲貴諸佛在果慈悲爲賤以貴敬賤也從以其夢中下是第四述夢也此下總有一百六十二行偈分爲二初四行半總明夢後一百五十七行半別明夢總又爲二初三行半明見金鼓後一行明見擊鼓見鼓又三初一行見鼓形狀次一行見鼓光明次一行半見光中諸佛即長行中三身意入觀所觀之境也次一行見擊鼓者自觀其觀智之機扣擊法身之境也出大音聲者已如上說自觀其境智合能多利益也從是大金鼓下一百五十

七行半偈別明夢事文爲二初從是大金鼓下至悉能滅除有二十一行三句明金鼓有滅惡生善之力二從一切諸苦無依無歸下一百三十五行三句正明教詔懺悔之法就能滅惡生善文爲六一有三行滅世間因果之苦二有三行生出世間因果之樂三有四行能令衆生自行化他俱備四有四行能滅衆生報障又發宿命通五有四行能令衆生得諸法門先少得後多得云云六有三行三句能破衆生八難流轉釋此六義皆從三塗漸

至人天二乘菩薩等一一皆有破惡生善之力從一切諸苦無依無歸下有一百三十五行三句是第二明教詔懺悔之法文爲五一從一切諸苦下有十九行一句教自說過罪懺悔二從我當供養下有三十五行明供養諸佛自行化他修懺悔三從諸佛世尊我所依止下有二十一行明稱歎修懺悔四從我以善業諸因緣故下有五十一行半明發願修懺悔五從若有敬禮稱歎十力下有九行結成懺悔生起五意者但衆生邪倒障理不

識法性愚癡障解不識因果惡業障行不識
善法聖人慈悲因大士之夢示其懺悔示其
道理示其因果示其善行故論自懺荷佛恩
深故伸供養供養不洩其誠故歌詠稱歎供
養是行須願指歸行願既圓結成讚美也自
懺文爲三初一行一句明法身是依憑之所
次兩行請佛覆護次十六行正明懺悔夫法
身具三德即是一體三寶法性是法寶寂而
常照是佛寶徧一切處是僧寶自凡夫二乘
雖不知亦不出法性總而言之一切菩薩何

嘗不以此爲歸依依此則本立而道生也內
本雖立外無佛加不得成就若蒙擁護斷惡
生善辦在斯須如萌芽得雨扶踈豐鬱是故
請佛也內外因緣既備正須懺悔也正懺文
爲二初三句總明懺悔後十五行一句別明
懺悔總三總懺三障也本者煩惱是二障
本也惡者報障也不善者業障也三障障三
身三佛三寶三障若轉諸三法門悉明故總
懺也別懺者別懺三障也文爲三初一行一
句懺煩惱障次一行懺報障次十三行懺業

障諸十力前者正懺煩惱障也獨頭無明癡
倒殊甚不識法身佛也法身佛徧一切處癡
闇不知公於佛前造作衆罪如牛羊不識天
子如鳥雀不識繫像於前造過愚癡不識法
身亦復如是父母恩者方便是父智度是母
此二法門能生法身而不識者是不知報佛
也不解善法者善法是助道之行能資智顯
理而不解者是不識應佛三佛皆不能知豈
非無明過患此別懺煩惱障也目恃種姓下
別懺報障也略言有三種一以姓傲他二以

財忽物三以壯年陵彼雖報有此三不應自
恣若縱恣者此報成障是也今契約法門解
出家人以慧爲姓足爲財戒爲年染此三法
自尊卑他者是名染法非求法也法華云汝
年少壯我年衰邁者凡人以五陰盛爲壯二
乘通教以空出有爲壯別教菩薩以法眼過
慧眼爲壯著此諸法者悉是恃強陵弱成報
障也悉須懺悔從心念不善下十三行別懺
業障文爲十二初一行懺由心口造惡業亦
是教他作惡也從身口意是自作惡也二一

行懺內外因緣造惡業三一行懺五欲因緣
造惡業四一行信受邪師造惡業五一行隨
順惡主造惡業六一行愛心所使造惡業七
二行為衣食女色造惡業八一行於佛世敬
田造惡業九一行於無佛世敬田造惡業十
三
兩句於正法造惡業十一一行於恩田造惡
十二
業十二一行半總一切處造惡業造業因緣
甚多不可具列故總而懺之若欲細釋從人
道為始二乘通別菩薩等行一一作之例應
可解故五十校計經云一至等覺皆須懺悔

即其義也從我今供養下三十五行明供養
諸佛所以供養者我本癡盲蒙示懺悔此恩
深重故興供養文為二初一行明財供養後
三十四行明法供養法供養為二初八行半
明化他法供養隨順如來慈悲法門濟利含
識是為化他修法供養後二十五行半明目
行法供養隨順如來智慧法門修十地功德
是為自行修法供養諸供養中法供養最為
第一財供法供事理自他皆悉具足也化他
法供養文為二初四行化他令其修行後四

行半化他令修懺悔初修行者我自行十地
爲法供養今復化人令法供養譬如一燈然
百千燈瞋者皆明明終不盡其意有四初明
化始以大悲拔苦次勸真因十地之行次勸
真果菩提大覺次勸精進督使速成夫衆生
等故性欲亦等善巧度一衆多亦然不計劬
勞積行累德功成大覺即智德滿盡一切苦
即斷德滿文自明顯不俟多釋觀心者調一
念心使真明發任運成真果調一切心數亦
復如是弟子衆塵勞隨意之所轉即此義也

次四行半化他令修懺者我蒙佛教懺還以
懺教他重重然無盡燈化化不絕也文爲三
意初欲爲說懺次正爲說懺三說懺已千劫
者假多以顯懺力大爾譬如惡人造罪山積
能拔於王難尚分半國償豈復問其前愆設
千劫造逆雖復厚重能拔法性之王從如來
藏中顯成法身者大覺朗然超升自在寧復
爲五無間業之所縛邪從我當安止下二十
五行半自修法供養文爲二初五行自修行
後二十行半自修懺前自懺竟今那復重譬

如金師從初習學至于皓首互燒互打器成
方息修行譬智燒修懺譬斷打智斷極乃止
重說無咎前是自行門今是法供養門爲異
也自修行又爲三初一句標章我當安止是
也次修因十地是也次成果菩提是也珍寶
者十地因可貴諸地即是珍寶也脚足者十
地是果家之基本故言脚足又十度是十地
之脚足於餘功德非爲不修隨力隨分正以
檀爲初地之足檀足若滿得入初地乃至智
度足滿得入十地故十度爲十地脚足也果

中有總明果滿別明果滿在文可知功德光
明者是果上二種莊嚴也令衆生度海者即
果上轉法輪也從諸佛世尊下二十行半明
自修懺文爲二初一行請佛後十九行半明
懺文爲五初四行半懺報障次一行半懺煩
惱障次六行懺業障次兩行明迴向次五行
半懺善惡兩難就報障文又二初二行半出
報障相次二行請除滅百劫者受報之時也
時中受身身即是報報有所作作即是障貧
窮困苦是依報不圓亦是報障也愁熱驚懼

三

十四

者由貧窮外偏故驚懼內焦皆報障也所作
衆惡者即想行陰苦也貧窮困苦者即色陰
苦也愁熱驚懼心常怯劣者即識陰苦也暫
無歡樂者即受陰苦也此皆報障意爾次煩
惱障文爲二初兩句出相次一行乞清淨次
業障文爲三初二行豎論三世造業次二行
橫明現起十惡次二行求懺過去業今正受
者名爲報障未受者繫屬行人若修善道能
爲障礙問過現須懺未來未有云何言懺答
數家呼爲未來有論家呼爲當有大經云遮

未來故名之爲殺現在念念滅何所可殺祇
遮斷未來名爲殺爾經論悉以未來爲有故
須懺也今更舉現事例之如在家人晝度生
方起無量惡念事雖未有次第必更忽然發
心捨家修道前所念事併與緣差未來之業
亦應如此雖非現有三五時到必然今若懺悔索
然清淨橫開現世三業爲十惡可解遠離者
惡斷也修行者善生也一住者初心因位也
逮十力者後果滿也次明迴向者衆生頑故
愛著於有不能升出今懺此罪故云迴向他

以若此國土及餘世界爲隨喜之文今意不爾此土他方凡所作善皆施衆生共向佛果如聲八角則能遠聞方便力大與虛空等又結文云是迴向不得作隨喜釋隨喜在下文也釋八難者此是善惡中論八難非佛前佛後之八難文爲二初四行指惡爲難次一行半指惡遮善爲難或指善遮道爲難初四句是報障難諸有者二十五有報得之身造作衆惡豈非報障生死險難有二解若取其因即是業障若取其果即是報障種種淫欲即

煩惱障心輕躁者復是報障輕躁是覺觀覺觀屬報法如羅漢斷煩惱盡出觀猶有覺觀散心當知輕躁是報障非煩惱也更舉世人學問迴轉易轍不成業障皆由輕躁之過豈非障邪近惡友難者惡友能汙染人三業此屬業障如移廐於屠邊如孟母鄰於哭貨朱赤墨黑即其義也三毒是煩惱障也遇無難難下此有二義一若不脩善障難不興若欲修善惡障即起善非是障惡來遮善名善爲難此義易知常人皆作此解也二者諸善是

難善能障道豈非難邪此義今當說遇無難
難者自謂無惡不肯修善如二乘入空生滅
度想生安隱想不復進求菩提即其義也修
功德難者多作有爲求可意果如一比丘專
行福德不修禁戒墮白象中七寶絡身金盃
承糞又如妙莊嚴王本事等豈非修功德難
值好時難者如劫初時在鬱單越時一向受
樂都不修道豈非值好時難值佛亦難者如
旃遮婆羅門女善星調達等皆是值佛而難
例此應云聞法起謗值僧起破皆是難也若

盟三

十六

讀作難易之難者此是惡來遮善之義使善
難成也若讀作障難之難者此是善自是難
能障於道又依經文云如是諸難今悉懺悔
當知經作障難之義我也從諸佛世尊我所
依止下二十一行偈是第三稱歎若論次第
前財法供養是身意身意未洩未備今更口
歎若作法門者前是供養法門今是念佛三
昧法門文爲三初一行標章歎次十九行正
歎三一行結歎標諸佛者橫則十方豎則三
世事即報應理即法身言略而意廣標章之

巧妙也我所依止者依止法性一體三佛也
佛海者四眼入佛眼十智入如實智皆失本
名字但名佛眼佛智如物投石蜜如流會海
無不甘鹹者法性三佛攝一切法故名佛海
也就正歎爲二初十六行寄言歎後三行絕
言歎寄言又二初一行略歎略況次十五行
廣歎廣況略歎者諸相好中略歎金色釋論
以即時鐵比即時金即時金比海金海金比
龍金龍金比閻浮洲金閻浮洲金比四天王
金如是轉轉比第六天金第六天金比佛身

金色第六天金如鐵又佛金光徹照壁障無
影佛入城時放光照地一女人低頭禮拜金
釵墮地唯見晃晃不知何者是地何者是釵
佛過後光歇方見金釵爾然金色身是衆相
所依處唯舉金色故知是總歎衆相好也金
有四義堅不可毀譬常得之者富譬樂體無
瑕穢譬淨色妙晃曜譬我諸德之中四德爲
總猶如須彌者須彌爲四寶所成況佛身具
足四德故知總況也廣歎廣況文爲二初十
二行半廣歎次二行半廣況廣歎又四從其

色無上下二行廣歎金色無上無上者我德也從善淨無垢下三行廣歎佛色無垢無垢者淨德也從功德巍巍下三行半廣歎佛色安住安住者常德也從三有之中下四行廣歎佛色能除苦毒即樂德也從如大海水下二行半廣況文爲二初二行廣況二半行合喻佛功德海思所不能知言所不能盡心行處滅言語道斷即此義也海水難知況常德也地塵難知況淨德也山斤難知況我德也空邊難知況樂德也諸佛亦爾下合喻也從

一切有心下三行絕言歎也文爲二初一行半正絕言歎二一行半牒譬帖合一切有心不能得知即是絕思既已絕口何所宣即絕言也更牒譬帖合在文可見從相好莊嚴下一行總結相者結一切相好者結一切好莊嚴者一一相一一好中皆具衆德以爲莊嚴也從我以善業諸因緣故下有五十一行半偈是第四發願行若無願如牛無御不能有所至如畫無膠如坏未火如水中月故以願持行亦是懺悔退轉之罪也文爲二初有

四十七行半明發願次四行約願隨喜初願
又二初九行自發願次三十八行半爲他發
願自願又二初四行願果滿次五行願因圓
果滿願又四初一行成佛道是願意輪滿次
一行說法是願口輪滿次一行摧魔是願身
輪滿次一行住壽久益是願慈悲滿因圓願
又四初一行具六度願有爲功德圓次一行
願無爲功德圓次二行宿命念佛圓次一行
值佛圓爲他發願文爲二前八行半願作藥
樹王身大悲拔苦後三十行願作寶珠王身

大慈與樂拔苦又爲四初一行總拔衆苦次
一行拔根不具苦次兩行拔病苦次四行半
拔王難苦與樂又爲三初十六行半與世間
果樂次九行半與出世因樂後四行結成上
文大悲拔苦根不具者令具今大慈與樂視
謹三十九
聽聰明暢悅快樂諸根語同與拔小異也從
願諸衆生常得供養下九行半與出世因樂
文爲二初三行半令修行外緣具次六行令
修行內因具外緣又二初二行值三寶二一
行半離八難人緣不同或值佛難不除或難

除不值佛今願其亦除亦值內因又二一半
行生尊貴家二五行半多饒財實人因不同
或多財而卑賤或尊貴而貧窮因不具足今
令其亦貴亦富女有五礙願其無五礙苦從
若我現在下四行結成自他誓願也前二行
結自後二行結他從若此閻浮下四行約願
隨喜隨喜者慶他修善也亦是懺悔疾妬之
罪也文爲二初二行隨喜於他後二行隨喜
於自從若有敬禮下有九行偈是第五結成
文爲三初二行結成斷惡故言超六十劫罪

次四行半結成生善故言國王大臣之所恭
敬次二行半結值佛多雖不別說善知識佛
自兼之

釋讚歎品

讚歎凡有四意一從能讚人二從生善三從
滅惡四從所讚人一從能讚人者前品明信
相思疑佛壽四尊盡降其室一心信解夜夢
金鼓出聲旦向耆山說夢今品佛述其昔爲
龍尊面讚法王願我當來夜夢晝說說斯人
之本事故言讚歎品二從生善得名者夫善

不孤運生必託緣緣中勝者無過於佛龍尊
讚佛能生妙善從生善緣得名故言讚歎品
三從滅惡得名者罪之尤者無過毀佛若翻
滅斯罪應須讚歎讚歎治於毀訾從能治得
名故言讚歎品四從所讚人得名者即是去
來現在三世諸佛諸佛極尊甚深無量稱揚
顯說故名讚歎品若欲分別述德名為讚褒
喻名為歎亦更互分別爾釋論第三十云美
其功德名為讚讚之不足又稱揚之名為歎
也此品有恭敬是身業尊重是意業讚歎是

口業口業不發身意不暢為暢身意音聲為
佛事故稱揚顯說褒美如來真實功德故言
讚歎品也結此四義都是四悉檀因緣立此
品名故言讚難品也此品雖從四悉檀立名
正是生善之用文為二一長行二偈頌而對
告地神者主此大地菩薩行行皆寄其上壽
命長久見去來今事證義事強如瑞應云積
功累德誰為證佛時指地是知我今說往昔
金龍尊事所以對告地神也又對善女天者
男天陽表權女天陰表實實智能生眾善善

生故宜對善女證往故宜對堅牢

云云今論生

善之用故對告善女金龍尊者此王往昔修

金光明法門依法性理故言金能以智慧讚

三世佛辯如雲雨故言龍能為衆生作大利

益為物所仰故言尊從行得名故言金龍尊

也總有六十二行半偈文為三一三十五行

世三

世二

讚三世佛二二十五行半發來世願三二行

結會二世事就讚佛文為五初一行半總讚

次二十三行別讚次三行徧類讚次五行半

絕言讚次二行迴向總讚者豎總三世橫總

十方世方是總事微妙寂滅是總理總理是

總法身總事是總報應二身總讚三身亦是

總讚三德三寶等種種三法門如是諸佛總

皆清淨清淨者即是總讚之辭也非但清淨

亦常樂我

云云從色中上色下二十三是塵

相別讚其文間出分為六意初六行半讚七

大相海亦讚髮紺之好次二行讚兩小相海

次兩句徧讚大相海次十三行又讚四大相

海次兩句讚一小相海次兩句讚手足柔軟

復是一大相海所以然者大相小相更相間

填共嚴佛身龍尊巧智如法相解如法相讚
故大相小相相間而讚爾夫相好本莊嚴佛
身佛身多種父母生身尊特身法性身身既
不同相好亦異相體不同相用亦異相用不
同相業亦異三身異者如林微尼園舉手攀
樹化右脇生天地大動阿夷甚驚披氎而相
相相炳明決定成佛悲不能聲此是生身佛
相也如釋論說尊特身佛巍巍堂堂譬如須
彌映臨大海所有大相小相亦巍巍堂堂不
同常身常光常相此即尊特佛身相也法性

身佛者非是凡夫二乘下地之所能見唯應
度者亦令得見此即無身之身無相之相一
切智爲頭第一義諦髻八萬四千法門髮大
悲眼中道白毫無漏鼻十八空舌四十不共
齒四弘誓肩三三昧腰如來藏腹權實智手
定慧足如是等相莊嚴法性身佛也種相業
者如釋論修百福德成於一相三千二百福
德成三十二相此即生身佛種相義也若以
空慧導諸相業一一業悉與空相應諸相應
中空相應最爲第一此是尊特身佛種相義

也若以實相慧道成諸業一一業無非實相
法界此是法性身佛種相義三身三種相三
種相業不得縱橫並別若一異者則不清淨
非微妙寂滅以不縱橫並別故是絕言言歎
所不及也今經正讚尊特身相上兼法性下
攝生身處中而明實讚者之巧云云一一相皆
明其用如足下安平相一切魔邪無能傾動
者一切有無無能動者一切邊無能動者如
頂肉髻相法不禮人亦不禮聖亦不禮分中
別有所出云云從去來諸佛下是第三徧類讚

諸佛法身平等一心一慧應化亦然特舉一
佛一相以爲讚端徧類諸佛亦復如是文殊
問般若云念一佛功德與十方諸佛等即其
義也身口清淨者有二解一云所讚者三業
清淨我今悉禮二云能讚者清淨以好華香
是身淨奉獻卽三是意淨歌詠是口淨卽三從設以
百舌下是第四絕言讚初三行半是絕言讚
次二行是絕心讚而有二番者或應擬三身
絕言也一人百頭頭有百口口有百舌住壽
千劫讚生身佛相好功德不能得盡一人千

頭頭有千口口有千舌住壽萬劫讚尊特身
佛相好功德不能得盡大地及天毛滴其水
一切有心不能知法性身佛相好功德是故
絕言絕心歎從我今下兩行總迴向也從如
是人王下二十五行半是第二廣發來願文

金光明經文句

不久云云從信相當知下兩行是第三結會古今如文

金光明經文句卷第三

音釋

企遠爾切舉
跣望也
早在早切
莢在早切
標實也
槐胡胡切

名木
篙篙姑勞切竹篙也
也也
也也
也也
也也

色柳
慝女六切
萎邑危切
洩私列切
也也
也也

切森
轍直列切
疊連協切
也也
也也
也也

登也
轍也
疊也
毛布

永樂北藏

金光明經文句

第一六四冊

金光明經文句卷第四

盟四

隋天台智者大師說

門人灌頂錄

釋空品

夫空者應有四種謂滅色入空即色是空滅
邊入空即邊是空此經通諸乘懺悔應須四
種空而今品但標空者專是即邊而空也何
故爾經云無量餘經已廣說空是故此中畧
而解說也又空者空有空無空有者空二十
五之塊有空無者空二乘之灰無兩邊清淨

名之爲空直作此說惑者迷名濫理不能超
悟今作六句分別空破非有非無非有非無
破空空修非有非無非有非無修空空即非
有非無非有非無即空空破非有非無者所
謂凡邪非有非無見二乘偏住非有非無證
別教教道執非有非無門悉爲空品空所破
也凡邪之見多種一單四見二復四見三具
足四見單四見可解復四見者謂有有無
無有無無亦有亦無有亦有亦無無非有非
無有非有非無無此是復四見具足四見者

於一句中具有四句四四十六句故名具足也雖單複具足皆苦集浩然雖計爲非有非無實是妄見故爲空品空所破也二乘偏住非有非無證者斷常見故言非有斷斷見故言非無有無二見滅無餘三界見思永已盡生滅度想生安隱想梵行已立所作已辦不受後有保此而已不復進求三菩提但二乘發真斷常見斷斷見其門不同或從有門入如阿毘曇或從無門入如成實論或從亦有亦無門入如毘勒或從非有非無門入如那

陀迦旃延經離斷離常名聖中道四門俱斷斷常名同中道實是保偏取證故爲空品空所破也別教教道執非有非無門者佛爲鈍根菩薩方便權巧作四門說中道如彼棧喻不得意者四門成諍故涅槃云真善妙有大般涅槃空佛性亦色非色非色非非色若各執一門則於如來有諍訟心不見中道執此教門猶爲空品空所破也新本云初地菩薩欲行有相道斯即一門之意也文中悉有四門之說大經云自此之前我等悉名邪見人

也非有非無破空者還是凡邪之空見二乘之空證教道之空門墮在二邊故爲中道非有非無所破也相修者見空證空教道空應修中道非有非無也非有非無見非有非無證非有非無教門應修中道空也相即者破二邊空即是中道非有非無中道非有非無即是破二邊空無二無別般若是一法佛說種種名空即是非有非無而不以非有非無爲名者爲略說故言空品也此品來意者懺品破惡讚品生善空品導成滅惡生善也

亦是導成用宗體等故釋論云若以無此空一切無所作導成上品故明空品也又常果顯體滅惡生善非不明空利者已解爲鈍根故起大悲心更明五陰生法本性空寂爾此品有四十五行偈分爲二初四行半敘欲說空次四十行半正說空無量餘經者指廣而明略亦是標略以顯廣若指般若則此經非方等攝若不指般若諸經不廣明空義此復云何答諸經前分結集人應作次第而其後分皆攝入前例且舉一以類諸如阿含經云

佛將涅槃舍利弗不忍見佛滅前佛而去均頭頭擎衣鉢來至佛所此是窮後之事而在十二年前阿舍中集當知阿舍後分至涅槃也又方等次第在法華前而云先於靈山已爲聲聞授記豈非方等至於涅槃又大品次第在法華前釋論云須菩提於法華中授記故而諸菩薩爲畢定爲不畢定當知般若亦至涅槃以此推之言次第者是前分也互相指者是後分也結集者以後分明義氣類若同向前集之或者不知言畢次第實不乖也

此經屬方等後分指般若爲廣說於義無妨略而解說者佛有略廣二門應作四句分別或名義俱廣如十八空二十空二十四空是也或名義俱略如一獨空是也或名廣義略如法性實相實際如如法界等衆多名共名一義是也或名略義廣如生法二空之名而義大廣迄從凡地至于極佛皆名衆生釋論云衆生無上者佛是從凡夫之五陰極至佛地亦稱色解脫受想行識解脫釋論云法無上者涅槃是今言略說生法二空下文云五

陰舍宅觀悉空寂善女當觀何處有人及以
衆生即其義也衆生根鈍者根緣不同或廣
說得悟名利根或略說得悟名鈍根此語似
倒身子一聞得悟是略是利目連再聞得悟
是廣是鈍此經意不就得悟邊明利鈍乃是
聞持邊論利鈍利人廣聞則能持鈍人略聞
方能持今機但有得悟之機無有廣持之機
故言不能廣知也無量空義者二乘真諦是
有量空義菩薩中道是無量空義此經明法
性實相即是無量空義也異妙方便者即是

悉檀方便巧作上來辨果明因滅惡生善種
種分別等是也起大悲心者一段衆生著有
病重故大悲亦重也我今演說者演名爲廣
與略相違上論生法二空是名略今論生法
二義故言演爾知衆生意者知此一機樂略
宜略對略悟略故言知意也敘欲說空意竟
從是身虛僞下四十行半偈是第二正明於
空又爲二初從身僞下十九行半明生法二
空境二從善女當觀下二十一行明生法二
空觀無境觀不正無觀境不顯應引止觀中

十番檢境智明不可思議下文云不可思議
智境不可思議智照新本云如如法如如智
即其義也明空境又二初從是身虛僞下十
七行半明實法境二從水火風種下二行明
假想境實法者觀五陰無法觀十六無人空
觀請理故名實法身雖未死虛假臭穢故名
假想亦名慧行行行緣空直入名為慧行帶
事兼修名為行行亦名正道助道空觀順理
名為正道不淨破貪名為助道小乘修正道
斷結名慧解脫人修助道斷結名俱解脫人

大品明菩薩發心與薩婆若相應者是修正
道遊戲神通淨佛國土者是修助道法華名
為大車價從即此意也涅槃明正慧遠離遠
離十相住大涅槃又諦觀白骨破二十五有
成王三昧衆經同論此二義而互有廣略今
經略明正助意也實法境又二初從身僞下
十行半約苦果論境二從從諸因緣下七行
偈約集因論境觀此苦集而起道滅若能見
四諦則得斷生死有既盡已更不受諸有
云苦境又三從身僞下兩句明生空境次從

六入村落下九行偈明法空境次從身空虛
偽下一行結上生法二空境是身虛偽爲生
空境者攬陰成身計有我人衆生壽命身見
得生若體其生名虛偽則求身叵得身見不
起餘知見亦寂故約假身爲生空之境又檢
此身原由一念妄想託父母遺體假名之始
也此赤白二滌色陰也覺苦樂受陰也想此
苦樂想陰也具三性行陰也識於中住識陰
也又精血是地大濕是水大煖是火大氣命
是風大四大圍空是空種心依此住是識種

此實法之始也觀此身與名依妄僞法豈可
爲真故言虛僞空聚者身名積聚如水上泡
圍空而起泡名亦起起即有滅泡名亦滅無
明業力託父母體即陰泡起陰泡起即身名
起陰泡滅則身名滅故言空聚也從六入村
落下明法空境何以知之此文但細檢根塵
不論人我故知是法空境文爲三初一行明
六根次三行明十二入次五行明十八界六
入者六根也能生於識名之爲根塵之所趣
名之爲入亦爲識之所入故名六入也檢其

元初但有三事謂命煖識如凝酥薄酪七日
一變巧風所吹開張五胞攬四大淨色結成
眼耳鼻舌身等諸根若立則有生識之用是
爲開色爲五心但爲一識依根住故名爲村
塵從此入故言結賊所止眼見耳聞鼻嗅舌
嘗身觸意緣各有所伺不得相濫故言各不
相知也從眼根受色下明十二入更開色爲
十并一入少分開心爲二成十二入也塵入
於根根亦入塵互相涉入通名爲入根生識
強別名爲根塵汗義強別名爲塵當一根塵

互相涉入故言各各自緣他根不入以塵此
塵不入他根故言不行他緣也從心如幻化
下明十八界更開心爲八色爲十界者隔別
不濫名之爲界文爲三一心如幻化下明識
徧諸根假令眼耳不對於塵心亦追緣預念
故言馳騁如人坐馳天下以愚癡故不知根
塵空險故爲賊害如大經云二心常依止下
明識常在根故言六根識常在塵故言境界
若謂識不在根塵那忽即對即覺以即覺故
故常在根塵釋論云根不壞心欲聞復有聲

衆緣和合故得聞即此義也三心處六情下
明識之於根乍出乍入如鳥在網出入間關
啄一捨一周而復始無暫休息識在根網亦
復如是或在於耳或在於眼去還無定雖復
無定而得論常在云云從身空虛偽下一行是
第三結上生法二空境也身空不可長養結
上生空境長養是十六之一長養既空十五
亦空即是結成生空境也亦無正主者結上
法空境遺教云此五根者心爲其主此明託
胎之始心在諸根之初名之爲主其實不能

控制諸根根大相違心爲受惱身病時心亦
隨病寧得是主邪或時更互論主如地具四
微則鈍爲水所制水但三微爲火所制火但
二微爲風所制風有一微爲心所制心無有
微故得爲主復爲四大所惱主義不成故言
無正主也無有諍訟者若計有四大則有相
違如四蛇相陵四國相拒可有諍訟今觀四
大空不能得空便故言無有諍訟也此是結
上法空之意也從諸因緣和合而有下七行
偈約集因明境即是集諦文爲三初兩行明

集起相次三行半明集相吞噬次一行半明
集善惡境前三是慧行後一是行行前三是
正觀境後一是助道觀境前一從無明生後
一從無明滅若直論生滅者未異小乘無明
本不生而生不滅而滅生滅不二而二爾從
諸因緣者苦集通四通從因緣欲明集義須作集
之因緣釋也前三句假名起之因緣後五句
實法起之因緣小乘破四大至鄰虛細塵從
細塵則有麤塵用此爲起假實之因緣今明
麤可析盡細塵亦盡麤細俱盡將何物作因

緣言因緣者無明內惑爲因不了生法二空
故染愛於外爲緣觸處染著故無明潤愛集
業得起故言從諸因緣和合故起以業起故
則有一念託胎招於苦果此一念託胎由無
明愛能生之心既是虛妄所生之心亦是虛
妄討其本末能所都虛故言無有堅實也妄
想故起五句明實法起之因緣由妄想不了
一念託胎五陰得起也業力機關者善惡業
是機關主色陰是機關具受想行陰於中動
作去來進止以自娛樂識陰依六入住故言

空聚四大所造故言成立也隨時增減共相
殘害者豎論增減者如涅槃十時別異從歌
羅邏時名增壯時名盛老時名減橫論增減
者火增水減水增火減風地亦爾又念念生
滅生是增滅是減又新諸根生故增故諸根
滅故減又下文云隨其時節共相殘害九春風
夏火秋地冬水增減云云譬如四蛇初在篋時
名生四蛇力敵名壯互相強弱名病蛇鬪困
暫息不動謂為調適息已復鬪蛇羸如老蛇
絕為死如是增減此是果身如此由乎集業

四分等如地瞋如火欲如水癡如風此四分
互相違瑞應云貪欲致老瞋恚致病愚癡致
死例云等分致生集業相噬致令四大增損
云云同處一篋者此明篋同性異蛇有螫毒四
大有八萬四千煩惱為害義同大經以假身
為篋身持四大如篋貯蛇篋壞則蛇去身滅
則大亡如鳥在籠云云又用業力為篋業持四
大業謝則大散如鳥在籠處處求出心鳥亦
然未曾一念繫在身篋恒常外馳此則念念
求死非安身道也其性各異者二上升是陽

二下沉是陰何故相違猶其性別性別那能和合成身諸方亦二者四大對四方風東火南地西水北又對四時風春火夏地秋水冬東與南屬陽而上升西與北屬陰而下沉故言二上二下諸方亦二若相對論者東上西沉南升北降若論四維者東方帶兩維一維陽上一維陰下餘三方亦如是或言一根中具四大二上二下云云悉滅無餘者初見散滅謂言風火向上地水向下比至上推不得於風火下檢不見於地水故言悉滅無餘也苦

果升沈頌異由於集業善惡天乖云云心識二性躁動不停者釋論云心意識一法異名對數名為心能生名為意分別名為識又言有異前起為心次起為意後了別為識例如意識不得為一二性者心有善惡性異意之與識亦有善惡性異故言二性也躁動者心前起時亦與數俱意識後起亦與數俱故言躁動又如四大壞時善惡業爭牽不知從誰故言躁動但此業未謝心常覺觀況復業牽寧不躁動有熟牽強牽此世雖行善先世惡業

熟既與時合即受惡報故言熟牽強牽者人
雖行惡臨終之時善心猛盛即隨善上升熟
牽強牽彌顯躁動亦是隨業所作而墮諸有
云云水火風種散滅壞時下二行明業謝棄苦
器也氣命盡是風去故言散燋盡是火去故
言滅水盡則身爛故言大小不淨盈流於外
地散滅是骨肉離解故言如朽敗木大小不
淨者身為大四支為小足支為大手支為小
手為大指為小如是轉轉作大小皆悉臭穢
不淨盈流此名助道若正觀降伏煩惱煩惱

不伏當修不淨助破欲心釋論云三解脫是
涅槃門道品是開門法不淨九想等是助開
門法不淨是破欲初門若進修背捨及大不
淨已身他身一身多身一國多國山林石壁
一切依正皆悉不淨即雖未爾想力若成怖
畏心起能大助道四開發正慧大經云不淨觀
亦實亦虛能破煩惱故名為實淨言不淨是
故為虛此不淨觀亦具生法二空大經云諦
觀白骨一一支節何者是我八色流光亦復
無我我不可得即是生空鍊骨人八色不見

四大無有於實即是法空此就助道明於生
法終成正道爾從善女當觀下二十一行是
第二明生法二空觀文爲二初八行半明修
因生法二空觀次十二行半明果成起用因
中又二初三行半約苦集明生法二空觀次
從無明體相下五行約十二因約明生法二
空觀約苦集又二初從善女下一行半明衆
生空次從如是諸大下二行明法空問四諦
十二緣是二乘法云何是菩薩觀門答四諦
十二緣通是三乘觀境譬如大道貴賤同遊

不可羣小行之而判屬民庶通意云何涅槃
云我昔與汝等不見四真諦云云又云凡夫有
苦無諦聲聞有苦有苦諦菩薩解苦無苦而
有真諦諸佛如來有真有實所以然者二乘
觀有量四諦菩薩觀有量無量四諦大經云
十二因緣凡有四種下智觀故得聲聞中智
觀故得支佛上智觀故得菩薩上上智觀故
得佛菩提復有別意大品云十二因緣獨菩
薩法如佛昔爲孺童雖行衆行非波羅蜜見
然燈佛得無生法忍一念相應習應苦空乃

至習應滅空習應無明空乃至老死空諸相
應中空相應最爲第一以空導行皆名波羅
蜜以得無生法忍故佛即與記當知菩薩豈
不觀於四諦十二緣邪二乘雖復同觀觀法
有異聲聞觀諸果總作一苦諦觀觀諸煩惱
及業總作一集諦觀又苦之與集總是現在
所以名總相觀也緣覺觀苦爲七現在五未
來二觀集爲五過去二現在三別觀三世別
開苦集故言緣覺別相觀也雖復總別有殊
同是自調自度同是析生法二空觀爾與菩

薩有異菩薩爲衆生修四等六度觀四諦十
二緣作生法二空今舉譬喻之如握五指成
拳若一指一拳應有五拳若一指無拳五何
得有我人亦爾攬五陰成衆生一陰有衆生
應有五衆生一陰無衆生雖五亦無即陰求
衆生不得離陰求衆生亦不得雖求拳不得
拳不妨有皮骨之指存雖求人不得人不妨
有五陰之法在二乘人得生空時未能知法
空更須析指皮肉骨髓分分推求亦不得指
地水火風窮逐鄰虛亦不得色前念後念亦

無想受求指不得指始知指無求法不得法
方知法虛既不得生法二空境亦不得生法
二空智通菩薩觀亦是爲菩薩二乘析生
法二空相如此但有自行爲他之異云云若論
別菩薩體空與其永異如見鏡拳懸體既虛
不勞尋檢鏡拳既虛鏡指非實鏡內拳指既
是虛鏡外拳指亦非實衆生亦爾但有名字
名爲衆生此之名字本來自空非檢後空名
既假名法亦非法體名即體法如大品云我
性如色性色性如我性今世生法由無明行

五果既虛二因寧實下文云本性空寂無明
故有無明既寂從無明生寧得不寂雖不得
生法二境而能了了通達二境不爲境所染
雖不得生法二空智而能了了通達二空智
不爲智所淨非染非淨雙亡二邊正入中道
第一義諦而能雙照二諦三諦朗然非前非
後一時大覺與此甚深法性相應金剛寶藏
具足而得是爲菩薩體生法二空觀諸小乘
師雖說析空同外道義何者析色極至鄰虛
或存塵不破或破塵令盡若存不破祇是常

見若破塵盡祇是斷見斷常宛然非邪何謂
諸大乘師雖說體空同於小道何者單用體
慧不能一念空心遊戲神通淨佛國土具足
解釋佛之知見何能三智一心中得五眼具
足而成菩提耶似小乘壞法人無三明六通
願智頂等祇是慧解脫人而已非小何謂今
經首軸窮深極廣序品云遊於無量甚深法
性空品云求於如來真實法身捨身品云求
於寂滅無上涅槃豈可用世人邪見豈可用
小乘之析豈可用大乘師之體解此空義邪

善女當觀下一行半明生空觀初一句對告
勸發次一句指上境次四句正作觀善女者
菩提樹神也諸佛說法必有對揚寄一以訓
衆故告其人也又時來機緣宜在善女若聞
對告宿善發生又男天表方便女天表智度
欲說智度破於愚著故告女天也又佛在道
樹得道欲說此道故對告樹神也此是表四
悉檀對告非無因緣也當觀者勸一人以例
諸一切菩薩必須修於智度無有菩薩不由
此者故言當觀也諸法者指上四諦十二因

緣若假若實二空境也名目雖略攝法則徧
故言諸法也如是者正明總觀也如是有三
義謂如事如理如非事非理如事者如助道
假想不淨流溢也如理者如生法二空無法
也如非事非理者如法性法身也又事即如
理如非事非理非事非理亦即如理亦即如
事理即如事亦即如非事非理三法不一異
故言如是三法亦一異故言諸法何處有人
者點出理觀也何處者若色處有人則不須
四陰若色處無人四處亦無人五處都無人

故言何處有人又果處既無人無明行因處
亦無人因果合亦無人離因離果亦無人故
言何處有人也人既無衆生十六知見等皆
無故言及以衆生也本性空寂者點出非事
非理觀也本性無事亦復無空空本空事既
其無事空何所空無事故事寂無空故空寂
本性如此非今始然故言本性空寂也無明
故有者點出事觀也若其空而復空那得此
事既有事即有空既有空即有非事非理此
之三種悉由無明故有以有無明癡故有行

四

十五

有行即有生法既有生法即有助事之觀助
來助正即有空理之觀正助顯本即有非事
非理之觀是事不知名爲無明淨名云從癡
有愛則我病生病生故則有藥起即此義也
若知無明本性空寂尚無無明那得事理非
事非理畢竟清淨故稱空慧也但我見深重
爲學道大障凡夫所作恒與我俱我行我住
坐卧言語無離於我我行施戒乃至我行智
慧若攬他遺體而計我者此我疏鈍若執法
塵而計我者此我密利如執一法謂我知我

解於法起我隨執一句是實餘皆妄語即是
邊見非道謂道即是戒取非理謂理即是見
取不當謂當即是邪見自是陵他即慢撥之
即瞋譽之即愛破之即疑不了即癡十使煩
惱以我爲根本不自覺知日夜增長縱令世
智辯聰如長介鏐腹難石石裂難樹樹折難
水水竭難火火滅去道彌遠假令隨禪梵世
極至非想我心常在將出復還如此凡邪尚
無暖法那能破我廣說此我即二十種身見
謂即陰計五離陰計五我中有五陰陰中有

五我是爲二十若一陰是我餘陰無我若併是我即有五我是義不然若離陰有我既離於陰我是誰我是義不然若陰中有我是則陰盛於我如器盛果如屋貯人是義不然若我中有陰則陰在我內是義不然爲破二

說四

十六

十種身見此約外境作如此說而其內心猶計有我復當反觀即智有我離智有我我中有智智中有我是義皆不然復破二十種身見內外合數即四十種身見是名生空毗曇云我見是共等因我見起時未動身口因我

見後生思惟時方動身口斷我見已悟衆生空成論明我見心即思惟能動身口斷我見已即悟衆生空亦悟法空大乘明我見即具諸法可不具於思惟悟衆生空即是悟實法空破二十種身見通上三句皆通用之若即事而理何處有人即陰離陰陰中無人人中無陰二十種身見破故言何處有人能觀之智智即是人離智有人人中有智智中有人此計亦破故言何處有人若作非事非理本性空寂觀者本性空寂本無即陰離陰陰人人

陰既無如此計破故言何處有人能觀之智
本性亦寂故言何處有人若作助道不淨觀
時若觀惡心取境即是汙穢五陰若善心慙
愧即是方便隱沒五陰是見皆依色色即不
淨以不淨故無人無我故言何處有人能觀
觀智亦復如是故言何處有人若得悟為論
破二十種身見是得衆生空無復見惑而作
二十種觀者除於實惑實惑若除即入修道
即應言何處有法若未悟為論者雖作二十
種觀見惑未除而於假名上伏愛度入實法

附註

十七

計我故法華云衆生處處著捨一取一如屈
步蟲須實法上更作二十種觀使空慧分明
處處作无咎從如是諸大下兩行明實法觀
上生空得悟即解於法為未悟故更說爾文
亦為三初兩句即法而空次一行一句即法
本性非空非假次一句即法而假例如生空
三意也如是諸大者標四大法也一一不實
者正明空觀也若四大各守其性者地守堅
性不應動不應煖水守濕性不應冰不應波
火守熱性不應貞不應燄風守動性不應持

不應觸壁而止一大既有三性非都堅非都濕非都熱非都動失本性故則是不實不實故空請觀音云地無堅性水性不住火從緣生風性無礙一一皆入如實之際即其義也上檢生空故言何處有人今檢法空故言一

不滅非是觀智令其不生不滅即事而理此之謂也以是因緣者觀解因緣也觀與理冥達即空即假即中大經云亦有因緣因滅無明即得熾然三菩提燈即因緣義也和合而有者即法而假也既本體不實那得大陰此由無明業因託今世遺體果故有四大五陰十八即是迷惑因果和合而有此法有故體有非有亦非有非非有即空即假即非空非假三觀明文在經寧不信邪更爲鈍根人作實法惑相或謂四大五陰是有是無是亦有亦無

是非有非無四執既生生名爲有是見依色
依色起我我生五利爲法恚怒復起五鈍十
使是集方招來苦來世不了展轉無窮生死
大海潦水波濤世世常爲大陰所惑惑此色
法即色陰憂喜是受陰取相是想陰起善惡
是行陰分別是識陰陰心起故名爲有法非
法空也心不依色亦復不依受想行識寂然
滅衆惡無量衆罪除如是尊妙人則能見般
若亦是甚深法性金光明中而得見我釋迦
牟尼行人若能如此觀生法二空則是懷璧

向本一世兩世能有所辦保不孤然矣從無
明體相下五行明十二因緣生法二空觀文
爲二初三行出境相後二行出觀相初又二
初二行明生空境故文云名曰無明釋論云
誰老死故知是生空境也後一行出法空境
文云老死愁惱釋論云是老死故知是法空
境也然十二因緣經論不同或三世或果報
或一念或十種三世者過去二因破神常之
見現在五果破神我之見現在三因未來二
果破神斷之見常途所用果報者初託胎歌

並四

十九

羅邏時爲無明一期始終論十二支也一念者華嚴云十二因緣在一念心中大集云十二因緣一人一念悉皆具足如眼見色不了名無明生愛惡名行是中心意名識色共識行名名色六處生貪名六入色與眼作對名觸領納名受於色纏綿名受想色相已名取念色心起名有心生名生心滅名死乃至意思法亦復如是一日一夜凡識幾許十二因緣輪網以自纏迴今更說其因起之相若觀名色由行行由無明於無明不了或謂有謂

無亦有亦無非有非無作四句取者皆是無明是事實是行是中心意名爲識識共色行名名色一一如前說又觀一念託胎是名色五胞開張名六入六入對塵名爲觸領納名爲受於此受中作四句分別或有受無受亦有亦無受非有非無受如眼受色於色不了是無明愛惡之心名爲行識共色行名名色六處生貪名六入餘如上說乃至意思法不了是無明愛惡是諸行餘如上說如此推十二因緣大樹枝條布濩徧覆三界誰能識邪

誰摧伐邪今經既是略說不論三世一念等
但舉生法爲二觀之境宜以譬顯如捉火燼
闇中舞之圓輪相續團團不斷火者實法也
輪者假名也衆生長夜著於假名舞燼不息
迷於陰入薪火不息十二因緣何由可盡若
知輪依於火止手則無輪火賴於薪除薪則
此句無火輪火雙無生法二空也生空境文例爲
三無明體相兩句明本性不有不無是中觀
境妄想因緣和合而有此兩句是假觀境無
所有故兩句是空觀境是故我說兩句結成

爾行識名色一行明法空境例應有三特是
文略得意可知衆苦行業下明生法二空觀
文亦三意衆苦行業不可思議一行明非空
非有觀本無有生亦無和合兩句明空觀上
句本無有生是生空下句亦無和合是法空
也不善思惟兩句明假觀前不善思惟致今
名色今不善思惟復有未來老死云云雖名爲
生法二空觀即空即假即中其文炳然明與
義會何所疑哉更爲鈍人說空觀相若假名
自生不須實法若由法生非假名生若假實

合生應有二假若離假實則無是處今之假
名但有名字名字不在內外兩中間亦不常
自有以不可得故是名觀假名空觀實法空
者若名色自生不應待業若業能生羅漢有
業何故不生若業果共生各有名共各無寧
共若無因緣生則無是處既不得生亦不得
不生亦不得亦生亦不生亦不得非生非不
生亦不得滅亦不得不滅亦不得亦滅亦不
滅亦不得非滅非不滅無滅無生名為無生
無生故假名壞假壞故則六十二見壞見壞

故實亦壞既不然火是則無煙日中舞燼是
亦無輪是略示空觀相中觀假觀在別記
我斷一切諸見纏等下十二行半偈是第二
果上生法二空用明觀成證果文為二初三
行半自行成後九行化他成自行文又二初
兩行智德滿次一行半斷德滿一切諸見者
六十二見八十八使等故言一切此是生空
觀成也以智慧刀者譬智慧利用上譬斷見
下譬斷煩惱纏者別明十纏煩惱網者通明
十使網有羅籠之失舍有覆閤之過達陰空

寂闇障不能蓋裂網破壞羅罣不能礙此是法空觀成也二乘所斷是通見纏菩薩所斷是別見纏淨名云結習未盡華即著身未斷別見爲華所著也而言佛斷見纏者若通若別究竟盡在於佛也釋論云衆生無上者佛是法無上者涅槃是無上假實佛地所不惑故言斷爾經論不同或言佛上上智斷下下惑無明力大佛智能斷一念相應慧正習俱盡無有餘或言有上士者名之爲斷無上士者名無所斷斯乃隨國隨時隨人隨悟皆有

利益云云證無上道者生法二空正道滿也微妙功德者生法二空助道滿也開甘露門下一行半明斷德滿甘露是諸天不死之神藥食者命長身安力大體光譬諸佛斷德住大涅槃真常樂我淨用知是斷德滿也然此義廿二意復欲通對華嚴諸位開甘露門對十住位初開聖道遮二邊故故言開也示對十行歷別顯示也入對十迴向迴事入理也處對十地處法性室也食味對妙覺自食斯味兼以被人下地非不化他自行未圓化亦不廣佛

地果圓斷德已滿慈悲力大能爲衆生開於
十住示十行入十向處十地食甘露味功用
具足斷德化他兩義皆成也又通對般若四
智開對道慧示對道種慧入對一切智處對
一切種智食味對佛住大涅槃以大悲令衆
生得此四智於果地斷德義亦無妨云云又對
法華開示悟入佛之知見良由佛德圓滿能
以大事因緣出現於世開示衆生佛知見也
於斷德義亦顯又涅槃云常樂我淨於果斷
最便如前釋云云吹大法蠡下九行明果地化

他滿文爲二初兩行轉法輪化他次七行四
弘誓願化他說法又二初一行說法次一行
神通餘經前神通駭物開後說法今經後神
通成前說法爾修因時生法二空之正慧得
果時智德滿故能說法化他修因時生法二
空之助道得果時斷德滿故能神通化他說
法舉四譬者聞法之益實自無量略舉四譬
別有所擬吹蠡是改號譬佛說小乘法改凡
夫苦忍之凡性入聖人之正性說大乘法改
凡聖之偏性入中道之圓性通教七地別教

初地圓教初住皆是改號之位從偏以入中也擊大法鼓者擊鼓誠進肅衆前驅此譬佛說法督進深行小乘位在修道通教在八地別教在十行圓教在初住此諸位以聞法力咸進真修道也然大法炬者炬能自照亦能照他譬佛說法令自他雙益如千年闇室一燈能了又如一燈然百千燈聞法之力自他俱益亦復如是通教八地別教十迴向圓教亦在初住皆是道觀雙流自他俱益之位也雨勝法雨者雨能成熟農夫加功扶疎益寡

時澤一降華果敷榮喻如衆行雖復勤修發趣事弱聞佛說法增道損生任運成熟自然流入薩婆若海如大恒中船不勞筋力疾有所到此並在雙流位中義如上說若得此意例華嚴之四位般若之四智法華之四知見涅槃之四德皆可解此一法豎擬諸經之位橫論一切諸位一聞法音隨類各解云云此中四譬皆言大者說大法也通途解釋明大非小位爾我今摧伏下是神通化他也怨結者四住是二乘怨結五住是菩薩怨結魔爲煩

惱主伐樹去根化物須降主若不降魔化道
不暢降魔之法須用神通譬如勝怨乃可爲
勇非法王不壞法王勝者是時化道得立爾
豎法幢者法幢三昧也高出衆行爲衆行之
望如兵望麾也三德不縱不橫故言微妙從
度諸衆生下七行是四弘誓願化他雖復成
果本願未休故言四弘益物亦名四諦益物
四弘是誓願之心四諦是所緣之境也度諸
衆生是初弘誓亦是未度苦諦令度苦諦也
從煩惱熾然一行是第二弘誓亦是未斷集

諦令斷集諦也從我以甘露下一行是第四
弘誓亦是未證滅諦令證滅諦也從於無量
劫下四行是第三弘誓亦是未安道諦令安
道諦也此中指檀爲四諦檀對於慳慳貪自
蔽是集集業招果是苦檀能破慳是道慳滅
是滅諦無量劫者積功高也遵修諸行者攝
法廣也論云檀義攝於六云捨身命財與後
際等得不壞常住名波羅蜜豎高橫廣故言
遵修諸行也

金光明經文句卷第四

音釋

塊苦怪切 棧房越切 需乃管切 騁丑郢切 馳
控苦貢切 噬時制切 歌溫也 羅梵語也 此云
切箴詰切 屬切 羸力追切 螫施隻切 蟲蟲 躁則
靜不安切 獲胡故切 燼徐火切 蠱盧戈切 蚌屬
督都毒切 催促也

永樂北藏

金光明經文句

第一六四冊

永樂北藏

金光明經文句

第一六四冊

金光明經文台卷第五

隋天台智者大師說

盟石

門人灌頂

錄

釋四天王品

四天王者上升之元首下界之初天居半須

淨五

彌東其金埵王名提頭賴吒此翻持國領乾
闥婆富單那南瑠璃埵王名毗留勒叉此翻
增長領鳩槃荼薜荔多西白銀埵王名毗留
博叉此翻雜語領毗舍闍毒龍北水精埵王
名毗沙門此翻多聞領夜叉羅刹此四王聞

經歡喜各領五百眷屬發誓護經從此標章
故稱四天王品觀心釋者東集南苦西道北
滅四諦理是四天觀四諦智為四王護四諦
境名護國護心數是護眾生世者他也為他
說心數名護他眾生八部者苦諦下有利鈍
見思法華指此為鬼神乃至滅諦下亦有見
思是為八部也若不照四諦理見思二惑侵
害心王毀損境界心王亡境國敗心數人民
迸散境智俱為鬼神所惱能觀苦集控作見
思則國安民寧能為他說四諦是護他國土

遮彼見思使得安樂是爲觀心護世四天王也此下十三品是流通段佛慈季末使邪惡不翳於正真經王不墮於來代有緣之者得正聞正聽故曰流通凡爲七意四天王至散脂明天王發誓勸獎人王弘宣此經正論善

集明人王弘經天王祐助亦是示往日弘經方軌鬼神品明聽經功德天神地祇若河若海菩提薩埵咸守衛之授記品證聽經功德之不虛除病流水引昔聽經之功德證今護持之非謬捨身品引昔行經不惜軀命誠勸

師弟勿吝法財讚佛品明諸菩薩稱揚佛法能宣所宣利益深重云云天王發誓又爲五四王以天力擁護請者大辯品以辯充益說者功德天品誓以資財潤請者說者地神品誓以地味膏腴味請處說處散脂品誓以威武摧外敵攘內難安於請說聽等也又天王護其國大辯護其師功德護其衆地神護其地散脂攘其災今經法大行也云云四天王品者有六番問答即爲六段第一白佛述有護國之能第二白佛述其護國之事第三白佛示

其軌模第四白佛要其法利第五白佛雙述
興衰第六白佛說偈頌德初番爲二一白佛
二佛述成白佛又二一經家敘二正白佛敘
敬如文正白佛文爲二一歎經二述能護諸
天信法有力是故歎經欲得經弘述其能護
歎經爲三從是金光明下歎經體從莊嚴菩
薩下歎經宗從此經能照下歎經用正說乃
多歎三則略攝於廣也法性之理佛所護念
文詮此理故言經王既言經王知是歎體約
體修行能令菩薩具二莊嚴成於極果既言

莊嚴知是歎宗世天淨天義天皆宗仰極地
施三業供養恭敬是身歡喜是意讚歎是口
又下從地獄上至菩薩無明未盡通有熱惱
此經能除如月清涼知是歎用云從世尊是
金光明下是第二述能護國文爲二一內以
法護國二外以策護國四五法護國又四一護國
之由二以法護國三以天黨護國四以天眼
護國護國由者由聞此經獲於四益身益光
明力益勇猛心益增進德益尊嚴理獲二益
謂法身慧命皆得增長由國弘經致斯法潤

寧得不護述所以者此義正與觀心相應以
四諦智護四諦境即是修行正法以四諦智
導諸心數使諸心數不行故名行般若波羅
蜜即是能說正法內有如此護國所以名護
世王正治國土爾時黨護國者此亦與觀心
相應心王即心數黨降伏見思利鈍諸使如
諸天王共眷屬遮諸惡鬼如轉輪王與七寶
千子有所至處四方歸德四王共五百所臨
之地何惡不除邪用天眼護國者以報得天
眼徹視無幽不燭防萌杜漸何惡不除邪二

從若此國土有諸衰耗下是智策護國令內
外因緣和合文爲三一若王國多災種種艱
難謂兵饑疾者我以智策勸法師往或威神
勸往或現形勸往或降夢勸往法師若往廣
宣此經如日出朝陽霧霧自歇此勸外緣也
次王心無智照災承闇入若有明慧變怪不
生師既秉法來儀王須專心聽受王若勤聽
天亦勤護所以加於可加護於可護一人有
慶賴及萬方王身與國安隱無患此內因也
若外雖有弘法人王內心不殷重則不和合

不能饗災也二者王無惠施則寡於福祿如
不勤田倉廚少穀勸王傾財供給四衆四衆
得安福資於王舉國眷屬一切無患此内外
因緣和合能致豐年流行云云三者王身無先
王之德行臣民不從口無先王之法言鄰國
不詠今勸王三業供養恭敬是身業尊重是
四
意業讚歎是口業夫高以下爲基辯以訥爲
師屈尊敬卑功亦大矣以天威力使鄰國遙
崇羽檄稱讚歌詠羨慕三業顯顯上之化下
如風之靡草鄰國既然國人牛馬草葉無不

低迴内向此則能讚所讚因緣和合頌聲溢
於鄰國云云經文分明尋之可見次佛述成文
爲二初合述歎經二述其能護國四王初歎
經說既合理佛述而成之成其上體宗用三
歎故言佛合述善哉善哉其上總歎一教佛
述成其徧讚百千諸佛諸佛從是法生故舉
多讚成於一也從於諸佛所下述成其能護
國又爲二初述以法護國二述以智眼護國
法護國有四佛皆述成上明護國之由由聞
經得益佛述今益良由先種發心畢竟二不

別如是二心前心難是故敬禮初發心此舉
前以成後述後以顯前從說於正法下述其
以法護世上云能說能行所以名為護世佛
亦述成能說能行得名護世云云從汝等今日
下超述其天眼護國小不次第於義無失上
云以淨天眼過於人眼佛述長夜利益夫天
眼夜照不假日光故言長夜也從汝等四王
及諸眷屬下追述其天黨護國上直言護國
佛今加讚是護三世諸佛正法也從汝等四
王及餘天衆下述其智眼和合護國上云請

法師入境攘惡此功歸已能却修羅之陣汝
勸王聽經供給四衆佛述其內智外福實是
消伏諸苦能致安樂如文云云第二番白佛述
護國之事文為二一白佛二佛述成白佛又
二一是經流布之處其王自能頂受又供給
四衆者我及眷屬誓當隱形令其顯益二者
惡鄰興兵侵斥善國我當隱形起諸怖懾種
種難起令其軍兵顯然退散尚不擾邊況能
壞中云云次佛述成文以為二從爾時佛讚下
至無聞訟之事是述成初意其上隱形護國

欲使經弘佛述隱形是護三寶我浮佛寶修
習菩提是法寶諸王無聞訟是僧寶述其護
一而能成三也從四王當知此闍浮提下是
述成後意上以天威懷之天力退之似若憎
惡愛善佛勸慈心平等向之爲惡者自懷爲
善者自豫非薄惡而厚善成其懷退之意也
又勸諸國各守本業住境自樂勿起貪企諸
王和則民無夭法興盛則熏諸天佛告帝釋
闍諍因緣人天損減善能慈和天下非止供
養於我則是供養三世如來非止安於一王

徧安諸王非止安於一國徧安一切故以慈
和述成第二意也云云第三白佛示人王軌模
文爲二一出其願欲二示其軌模願欲有六
一欲安己身二欲安妻子三欲安宮殿四欲
王領殊勝五欲攝諸福德六欲國無憂苦六
願如文從世尊盟五如是人王下是第二示其軌
模雖不次第六數足上欲安身今示莫放逸
制心則身安也上欲安宮殿今示嚴法堂幡
蓋映於上香華麗於下三寶受用則柏梁無
災上欲王領殊勝今示洗沐香塗敷恭去慢

一身敬於此八絃休於彼上欲攝取福聚今
示正念聽經正念聽經能致無量功德天神
竭其力覆地神竭其力載鬼神竭其力護臣
民竭其力愛上欲安妻子今示和顏與語勸
其興福內外修善感益事多上欲得國無憂
苦今示應自喜慶自勵忘疲倍作利益一人
既悅則四海謐然此之謂也次佛述成文爲
二先述成六方法次述成六願欲四王約六
事又所說少止在現世佛約一事而所益多
超無量世倍述成之從佛告四王下祇弘經

聽經即是述成安身方法上直示心不放逸
今加示羽儀出宮迎候步步值那由他佛方
法既倍體亦彌安從復得超越爾許劫難者
述成安國方法上止一世無憂苦今則超爾
許生死之難從復於來世封受輪王者述成
安妻子方法輪王有玉女千子七悉無怨對爾
許劫中妻子常安也從亦得如是現世自在
之力者述成上安於王領方法也從常得最
勝七寶宮殿者述成上安於宮殿方法也從
在在生處訖具足無量福聚述成其上攝福

方法也從汝等四王下述成其六種願欲從四王下至不退轉述成上願安身從已爲得值至畢三惡道苦述成上安國從我今已種輪王釋梵之因述成上願安妻子從已種無邊善根下述成上欲攝福聚從後宮宮宅無諸凶衰述成上願安宮殿從國土無有他方怨刺述成上王領第一從汝等四王下更總結成六法六願皆令具足者若能屈已迎候至心聽法即是六願六法又迴利施天亦即能令六願六法成就滿足也第四白佛要其

人王施善此由第三段末文爲二一白佛二佛述成白佛又二一人王運心二天宮相現人王心存至典是故香作金光迴施必得是故天宮相現香至天宮龍宮鬼神等宮總至三法界爾觀心解者以智慧火然實相香起戒定慧煙實相是真法故言金光戒慧與理冥故徹照無礙也云云次佛述成文爲二先述香光非但至天宮等三法界徧至百億諸宮又至恒沙佛上總而言之徧至十法界也從諸佛世尊聞是香氣下述成人王運善奉施

諸天爲諸佛所讚先讚因成次讚果滿如文
第五白佛雙舉興衰文爲二一白佛二佛述
成白佛又爲三初從白佛至諸惡災患悉令
消滅是第一舉興勸從若有人王心生捨離
至善神遠離生如是等無量惡事是第二舉
衰勸從世尊人王欲自護及王國土是第三
正勸舉興勸爲四一人王弘經則四天隱形
聽受二非但四王聽受釋梵八部皆集聽受
三以是人王爲善法知識四既得法利護國
彌勤皆如文次舉衰勸亦四一王不弘經天

失甘露則威勢減少二釋梵舊神並皆遠捨
三惡鬼亂行災毒競起四展轉結成災災何
故起惡鬼亂行鬼何故行天神捨離天何故
捨不聞法食何故無法食王不弘經如文三
正勸爲六一欲得現利故必定聽二天欣法
食故必定聽三出過三論故定聽三論者四
韋陀論說梵事毗伽羅論說十善事僧伽衛
世師勒沙婆論說學通事云云四始終得益成
就菩提故必定聽五教主勝於釋梵故必定
聽六諸法之本故必定聽皆如文次佛述成

文爲二初番述成舉興勸不弘則衰無可述
成又解云前番則兩述成而與安樂是述成
舉興勸滅其衰患是述成舉衰勸從若有人
能於人天中作大佛事者述成正勸云第六
白佛文爲三一說偈歎二佛以偈答三歡喜
發誓偈歎有八行半文爲三初一行歎三身
次五行半歎身相次二行結歎夫三身有通
別依文是別空是法身日是報身月是應身
通意者空是法身日是報身水月是應身空
是法身月是報身水月是應身空是法身日

四五

九

中空是報身水中空是應身月亦如是依結
歎文空是法身月是報身水月是應身空是
法身日是報身皎是應身化法是法身化主
是報身化事是應身雖復別說義則通融故
文云無有障礙即通意也歎身相文爲五初
一行歎上兩相謂目與齒次一行半歎智斷
兩德謂智三昧次兩行歎下兩相謂平與網
次兩句絕言歎謂不可思議次兩句結歎夫
相好不獨在應身報法亦通莊嚴父母生身
者應相好也莊嚴尊特身者報相好也莊嚴

法門者法身相好也此中歎智斷即法身相好也文云無有障礙者非獨歎一身相也偈初標佛月今先結佛月爲三身次結三身通融故言無有障礙次結佛日故言如燄次結佛化身即是四身義故言如化皆具三身四身則是無障礙也結竟即禮禮於佛月亦是禮佛日佛化也品初歎經歎體宗用品後讚佛辭異義同佛真法身即是體佛月清淨即是宗應現水月即是用天王天辯其妙若此也問空譬法身月譬報身空爲作月不作月

空若作月月非空作空不作月月那依空答空不作月亦不作非月月非月必依於空法不作報亦不作非報報非報必依於法又問法不作報非報報非報必依於法者亦應月不作影亦不作非影影非影必依於月者月亦是法身耶答智與法冥法是法界智亦如法界云云又並影不作動與不動動不動必依於水水亦是法界耶答動不動譬機一切諸法中悉有安樂性譬法界亦是無妨又淨度三昧云衆生亦度佛若無機感佛不出世亦

不能得成三菩提出世菩提皆由衆生機爲
法界此義成也佛答二十四行半偈天王所
以讚佛者佛能說法故也法王所以讚法者
法能成佛故也般若云我初成道觀誰可敬
可讚無過於法法能成立一切凡聖故佛讚
法以答天王文爲三初一行歎經體答其法
身次一行歎經宗答其報身次二十二行半
歎經用答其應身悉如文三四王歡喜發誓
如文
釋大辯品

辯有四種小辯無量辯雙辯大辯無漏法名
小辯恒沙法名無量辯備二種名雙辯雙非
雙照名大辯此天住智慧莊嚴法門自住大
辯以自在力爲悅衆生故隨說一辯若二若
三若四故名大辯爲宜衆生故若授一辯若
二若三若四宜而立之故名大辯爲對衆生
故或對一辯若二若三若四對而治之故名
大辯爲悟衆生故若悟一辯若二若三若四
一悟一切悟而開發之故名大辯對佛發願
以大辯加於說者故稱大辯品文爲三一從

白佛下以大辯力加益法師二從若有衆生
於百千下以感應力加於化道三從復令無
量下以行力加於聽者初加法師以樂說辯
才莊嚴次第是辭辯大智是義辯總持是法
辯若有衆生下加化道流布不絕加其能化
之道無人無所化無道無能化因緣和合化
道不絕也從復令無量下是加聽衆兩益聞
經至不退轉是加因益必定得菩提是加果
益文言雖略誓願甚深爲益大矣
釋功德天品

此天住福德莊嚴法門攝一切法而以功德
爲首故言功德天又能與說者所須無所乏
少故名功德天又令說者晝夜思惟是經深
義故名功德天又令聽者速成菩提具此衆
義故名功德天品此是天王護經第三意福
資請說及以聽者文爲六一從白佛下發誓
四事資給法師二從我已於過去下明福德
之由三從若有人能稱下勸示行法文中有
略示廣示云云四從我於爾時如一念頃下誓
臨影響五從若能以已所作迴施我下要求

同行六從應當禮下別示歸敬悉如文

釋堅牢地神品

上諸天或住善權方便道為眾生法父此天住善實智度道為眾生法母一義也譬如陰陽覆載卉木智度養育出生眾生善二義也餘

明五

十二

度各有所主未亡未泯實智照了無相無名三義也餘度有等有上智度無等無上是究竟度四義也智度法門常無改變義曰堅牢常也能荷樂也能生淨也名之為地德力自在我也稱之為神從此等法門故名堅牢地

神品此品是天王護法第四意翻涌地味資益請說聽等地也文為三一從白佛下誓涌地味利益行者二從爾時佛告下如來述成三從爾時地神下發誓弘經初涌地味文為三從初白佛下明已身利益凡約八事展轉增長由聞法故法味增長法味增長故氣力增長氣力增長故翻地味增長地味增長故諸物增長諸物增長故眾生五果增長五果增長故修行增長修行增長故供養增長供養增長故弘通增長悉如文從何以故世尊

下明眷屬利益是經力增長凡約五事展轉
增長以經力故我眷屬增長眷屬增長故地
味增長地味增長故諸物增長諸物增長故
衆生快樂增長快樂增長故依報皆具足具
足亦名增長從世尊是諸衆生下名報恩增
長凡約六事展轉增長以知我恩故專聽增
長專聽增長故功德增長功德增長故教他
增長教他增長故地味增長地味增長故受
樂增長受樂增長故信施增長悉如文二佛
述成文爲二一約聞經展轉增長從人世至

第五

十三

天世從天世至出世日夜即受不可思議快
樂即出世樂也地神所說止是今世增長如
來述成文雖略意極長遠二述成供養增長
從人世至天世從天世至出世長遠之義準
前可知云云三發誓護經文爲三一誓護說法
者二誓護化道不絕三誓護聽法者如文
釋散脂鬼神品
具存梵音應言散脂修摩訶翻爲密密有四
義謂名密行密密智密密理密云蓋北方天王大
將餘三方各有東方名樂欲南方名檀帝西

方名善現各有五百眷屬管領二十八部孔雀王經云一方有四部六方則二十四部四維各一部合爲二十八部又說者云一方有五部謂地水火風空四方有二十部足四王所領八部是爲二十八部巡遊世間賞善罰惡皆爲散脂所管聞經歡喜發誓護於說者聽者從能護人受名故言散脂云云文爲四一從白佛下發誓護持二從何因緣下述有能護之德三從散脂大將下誓以智力充益說者四歸敬本師初段有經家敘正發誓言悉如

文述德又爲三初標次述後結標如文述又爲三初五句述智次五句述境次五句述正三番稱世尊知是三種意也神既名密述名顯德應談密義智若淺深階級次第不名爲密即一智一切智一切智一智非一非一切而一而一切者斯是智密若得此意五句一句一句五句非一非五而一而五唯數唯密爾若境可以智知可以口說者境則非密不可智知不可識識不可以名名不可以言說是名不可思議密境也而約五數論密者例

四五

十四

前可知也若對邪道明正道待邊說中此正
非正此中非中皆非是密即邪而正即邊而
中邪正中邊無二無別者乃名為密思益云
若以心分別一切法者一切法邪若不以心
分別一切法者一切法正即其義也我行正
道若境若智從此得名唯然世尊自當證知
云云又此三番一往是身口意密前五句言知
知即意密次五句言現見現見屬眼眼屬身
即身密後五句明正解由正解故言正分別
分別即口密所以言不彰露者是密義也如

此述名密義已顯賞味無已更復略說世尊
我知一切法下作三觀義解之知一切法一
切緣法兩句同是因緣所生法境何者能生
為因是初句所生為緣是第二句能所合故
諸法得起中論云因緣所生法即此義也了
四五一切法者了達虛無也中論云因緣所生法
我說即是空是為從假入空觀也知法分齊
者知空非空用道種智分別假名凡聖之法
無有差別中論云亦名為假名是為從空入
假觀也如法安住一切法如性者以二觀為

方便得入中道第一義諦中論云亦名中道義即是中道第一義諦觀也含受一切法者即是中道正觀能雙照二諦故言含受若三觀一異縱橫並別者則不名密觀即一而三即三而一名爲密欲知智在說說即口密也世尊我現見下五句作三諦三解脫義釋之現見不可思議智光者光是實智如日月光常明不息此實智照不可思議真諦境成圓淨解脫也不可思議智炬智行智聚者皆是權智如人執炬屈曲照物乍興乍廢隨順機

緣或此或彼行是因義聚是果義從因以向果果興而因廢皆是權智照不可思議俗諦成方便解脫也不可思議智境者是法如如智此智與法如如冥故言不可思議智境此智照不可思議中道第一義諦成性淨解脫也若三諦三解脫一異縱橫並別者非不可思議也以不一異並別故故名不可思議不可思議故名密也世尊我於諸法下五句作三身釋之正解正觀正解能顯體體顯名正觀正觀是報身也得正分別正解於緣者分

別機緣不待時不過時普應一切即是應身也。正能覺了者無覺無不覺名為覺。非了非不了名為了。究竟清淨之覺了即法身也。若此三身縱橫一異者不名為正。非一非異不前不後故名為正。正即密也。約正明法身即是金義約觀明般若即是光義約不思議解脫即是明義。三德是微密之藏。金光明是微密之教。從密教生密解。安住密理行於密行以密利他。故我名密。唯然世尊自當證知。復次此十五句互相釋成。若正解正觀十五句

皆正解正觀也。若不可思議智光十五句皆不可思議智光也。若我知者十五句皆知也。云云又作五種佛性釋者。正性緣性了性三名不異。又一家取果性境界性為五。又一家取果性果性為五。若作果果性即沒境界性為緣因性所攝。若開境界性即沒果果性為果性所攝。雖開合不同。終是五數。今以五知對五佛性。我知一切法者。知一切法中悉有安樂性安樂性者。即正因佛性也。一切緣法者。無量功德低頭舉手之善緣。因佛性也了。

一切法者即是般若空慧了因佛性也知法分齊者即世間出世間因果不濫境界因佛性也如法安住如性者即是果性究竟安住如中也含受一切法者還是果性能雙照含受也若作果果性者取知法分齊爲果性克果智照分明爲分齊也安住如性含受爲果果性云云若然者下兩種五句亦應對五佛性師雖不釋義例應爾準須釋出其意消文令會爾世尊以是義故下是結文也從世尊散脂大將下是第三發誓以智辯充益說者文

明五

十一

爲二先益能化次益所化益能化爲三莊嚴言辭下益其口業衆味精氣下益其身業心進勇銳下益其意業從以是之故下益其所化此亦爲三以是之故廣說是經此是未種者令種也若有衆生下是已種令熟也無量衆生下是已熟者令脫悉如文此消文大好從南無寶華下是第四歸敬文也佛說一切衆經初皆歸敬而譯人略之諸論初亦先歸敬此文是說竟歸依三寶在文可尋也

金光明經文句卷第五

音釋

薜荔多

梵語也此云餓鬼薜

多

腴容朱切腹

檄

刑徒切

八絃

之乎萌切九州

有八絃

謐靜也

分齊

分扶問切齊才詣

銳

俞芮切

分齊

限也

金光明經文句卷第六

盟六

隋天台智者大師說

門人灌頂錄

釋正論品

正論者正名爲聖聖有二種一世聖二出世

盟六

聖論名覈實一覈事實二覈理實此品是先王舊法世世相傳先王傳力尊相力尊相傳於信相信相又傳其子其子又傳於後世世世正聖世世善實即是先王之法言亦是世界悉檀立名名正論品王行此法法律相應

陰陽以之調日月以之順百穀以之豐萬民以之樂社稷以之安治化以之美即是民用和睦上下無怨亦是爲人悉檀立名名正論品王用此法外敵不敢謀內姦不敢驚妖星不敢現惡虹不敢行暴風不敢動疾雨不敢零是則禍亂不作災害不生亦是對治悉檀立名名正論品此之世善本金光明從金光明出此正論善用此正論天宮天身以之光明天力天威以之增長天心爲之倍樂天之法味爲之倍更深遠即是先王之至德要道

亦是第一義悉檀立名正論品也此文是流通中第二意明人王弘經感通冥聖天王佐助善政興隆文爲二一長行說事本二偈頌說正論長行中對告地神說昔尊相如文偈有八十二行文爲四初二行半集眾次三行半發問次一行結問開卷後七十五行梵天答即說正論也集眾文爲三初一行是佛敘尊相欲爲天子說先三本法次一行佛敘尊相誠聽次半行明說論處所次四王發四問一問云何呼人爲天二問非天所生而名

天子三問處王宮殿何故名天四問以人法治世那得名天次一行成前起後可見云問既有四答亦爲四一答天護其入胎雖是人子而稱天子三十三天各分已德雖是於人而稱爲天雖處人宮殿用天律治世雖是人主而稱爲天雖是人法治世令眾生行善多生天上以因中說果故稱爲天從汝今雖以下是梵答文爲二初十行半略答後六十四行半廣答略中有四初一行半許答次因集業故一行略舉昔因今果答其問王義次五

盟大

二

行舉三義答其問天義次三行舉三義重答問王義答天舉三義者未入胎入胎分德力加是也以護胎故稱爲天子答第二問也以分德故有其天德故稱爲天答第一問也神力所加修善遮惡後必生天因中說果故稱爲天答第三第四正法治世名爲天問也答半名爲天三義竟從半名人王已下答有三義故稱半爲王一名執樂者樂由於王王執此樂使天下和平五日一風十日一雨老者擊壤小騎竹馬誰不歸德故執樂者名王二

者遮惡爲民除害天不亢旱地不洪流草不折傷民無疾癘者誰不歸德故遮惡名王三父母者誨示禍福導語善惡制禮作樂而民知禁誰不歸德故父母名之爲王能爲民下作父母故諸天護之名爲天子以遮惡不起

問六

三

諸天分德名之爲天以執樂故因中說果復名爲天非但半名人王義成半名爲天三義亦顯從若有惡事下三十九行三句廣明非法不得名天不得名王六義俱失三十三天各生瞋恨是天不護不護故非天子是諸天

王各相謂言是天不分德不分德故不得名
天捨遠善法增長惡法則無天因寧得因中
說果歎人爲天也生大愁苦者無執樂義疾
疫流徧無遮惡義縱惡不顧善無父母義云云
從當正治罪下二十四行三句更廣說六義
當正治罪即父母義諸天護持即天子義以
滅惡法即魁膾義魁膾名典軍遮制惡鬼鬼
畏典軍不敢亂行也修習善法即執樂義應
各爲說即示因果義諸天即分德義還以六
義消文皆可尋云云此中應明觀義自思之云云

問金光明是正論本其意云何天者即法性
金也法性作依止故言天護分德者即光也
報身與法性冥即是分德也神力所加者即
明也云云又父母者即金也法性爲父母故遮
惡即光也執樂即明也以此爲本故能正論
爾如半名人王半名爲天爲世間正論半名
出世間正論本末相關即此意也
釋善集品
此轉輪王集眾善法如海導師善海無涯六
度則攝六度又廣二度略攝謂檀與智提如

意珠捨四大地滿中珍寶以用布施即集檀
行也合掌而立請寶冥尊者宣揚顯說是金
光明即集智行也檀智既然餘法亦爾從行
得名故稱善集品也此六度不同是世界悉
檀集善也修於五度是爲人集善也修於智
度是對治集善也皆波羅密是第一義集善
也從此四集得名故言善集品此品是第二
人王弘經上明世間正見感動天地此明出
世正見感動賢聖云云文爲二初對告地神二
以偈說偈有六十四行也分爲二初四行通

明因地行檀次六十行半別明善集施財施
法別爲六一六行半明事本二十一行半明
聖王請法三十九行半明尊者宣揚四十行
半明輪王行施五二行結會古今六十行半
引因果以證以勸悉如文就此品論金光明
者善集波羅密金也集般若光也集五度明
也就寶冥論者在一窟中金也面如滿月光
也讀誦如是經明也就二人作者在窟中金
也許爲王說光也王提如意珠雨四天下珍
寶明也

釋鬼神品

鬼字訓歸又云畏也報多怖畏如阿修羅

云云

又云威也能令他畏其威也神者能也大力者能移山填海小力者能隱顯變化此品通列一切天龍江海日月諸神上已天題品竟

明度六

五

無容再出雖通列諸道而鬼神文多從多故以之題品此品是第三一切天龍鬼神天靈地祇咸皆發誓溥徧弘宣以勸流通文爲二一長行二偈頌長行中先舉事別次圓供養事別者佛從慈悲中起受供養者蓋應佛也

佛從如中起覺智智與如合者報佛也一切法悉是諸佛行處者法佛也作如此解者三佛塵別若修事之供養供養亦別也圓供養者勸聽經聽經是法之供養諸供養中最爲第一第一供養者供養一切佛能說文字是應佛能詮是報佛所詮是法佛能敬文字即敬三佛亦是敬三世佛諸佛從此生故供養文字即供養一切諸佛

云云

又別時重聞更記

之長行舉四願欲而作一勸若欲知佛行處行處者即如如境法佛也欲知者知是如如

智報佛也能聽此經此經即文字文字即應
佛也能聽者隨順佛教即法供養法供養即
妙供養也聽經能生覺智覺智生故即是佛
受供養也聽經一事具諸願欲祇圓一事具
別諸事也偈有一百二行半分為六一從若
欲供養下十一行頌上長行祇能聽經即是
舉圓妙以勸修二從隨所至處下三行半舉
聽經即能禳災以勸修三從於說法處下六
行舉聽經致靈瑞以勸修四從威德相貌下
五行半舉祇聽經有威力以勸修五從大梵

天王下四十九行半舉聽經能致天龍鬼神
以勸修六從於諸衆生下二十七行舉祇聽
經能令國土安樂以勸修云云盡道者四天上
遣神名彌栗頭虔伽陀漢言善品主盡毒也
摩醯首羅餘經翻為大自在灌頂經翻為威
靈帝摩尼跋陀翻為威伏行富那跋陀翻為
集至成金毗羅翻為威如王賓頭盧伽翻為
立不動車鉢羅婆翻為忍得脫曇摩跋羅翻
為學帝王摩竭婆羅翻為除曲心繡利蜜多
翻為有功勳勒那翅奢翻為調和平劒摩舍

闍大

六

帝翻爲伏衆根奢羅蜜帝翻爲獨處使醯摩
跢陀翻應舍主薩多琦梨翻大力天波利羅
睺翻勇猛進毗摩質多翻爲高遠腓摩利子
翻英雄德波訶梨子翻威武盛佉羅騫馱翻
吼如雷鳩羅擅提翻戰無敵脫因者脫業障
也脫果者脫報障也度諸有者脫煩惱障也
釋授記品

有四種授記今是二種云授者與也記者記
成道事也此中授三大士一萬諸天當來成
佛事故言授記亦名授剎亦名授決授劫國

數量名爲剎審實不虛名爲決從佛所與名
爲授從其所得名爲受此中從佛所與故言
授記此是流通中第四意舉昔行經之因方
成圓極之果證弘護不虛以勸流通也文爲
二一與記二疑記與記爲二一與三大士記
四六
二與十千天記與三大士記又二一同緣者
集二正與記世界轉名淨幢者應論四句此
中是其一也十千記又二一聞經生解二正
與記云從爾時道場下是第二疑記又二一
疑問二佛吞疑者夫移山填海非一日之功

菩提極果積行方尅忉利暫下無久聽之勞
不聞往昔有難思之行行淺記深是故疑惑
如餘菩薩者六度菩薩引錐指地無非捨身
命處戒忍禪智滿三僧祇若通教菩薩從假
入空非止一世修行從空入假動逾塵劫若
別教菩薩直行一行動經無量阿僧祇劫況
復徧行衆行量不可數尚不獲記少時聞經
而得斯決時衆咸疑故樹神發問也佛答爲
一一舉現行二舉遠緣現行者捨天宮樂故
來聽經聞三大士獲菩提記我昔本誓與其

法食三事和合故與其記也此意證成鬼神
品初以妙供養供養三世諸佛及欲得知諸
佛行處決定至心聽此妙典雖有此旨未見
其人今此十千即其人也聞記當果果必有
因因金光明生殷重心起功德身心無垢累
起般若身猶如虛空起於法身一心中聽三
德圓成復有無量功德說不可盡此不得記
記與誰乎證聽功德意在於此以隨相修指
今現行行隨實相而修也有妙善根指於遠
緣也遠緣實相而種善根也從亦以過去下

是舉遠緣答也文爲二一略二廣此中少文是略除病流水兩品是廣答也

釋除病品

廣答遠緣由醫王救疾故言除病品通取後流水品文爲五一緣本二遠緣三近緣四結

即大

緣五會緣從佛告樹神下明緣本如文從像法中下明遠緣遠緣爲六一明父二生子三國人遇病四其子請五父爲說六知己徧治子請爲三一見人退病二思惟三正問問爲四初一偈問四大增損二問飲食犯觸三問

治病醫方四問病動時節身火不滅者食飽熱病慙息食消熱復更生故言身火不滅也水過肺病者水多則損肺即是痰病也父醫還答四問初六行答四大增損二一行半答飲食犯觸三二行答病動時節四八行半答治病方就六行中分二初一行是佛敎父醫欲答爾次五行正答時節時節有二一俗法四時謂春夏秋冬爲歲末春爲歲始而初言夏者或可趣作此言或可答問正是於夏三三而說者一時三月謂孟仲季四時即十

二月也若依佛說法一歲三時謂冬春夏夏
為歲末冬為歲始何故爾為破諸弟子著常
為開安居迦提月故沒秋時爾佛法三時亦
是三三說也若二二說足滿六時者依俗法
四時時本二月土寄四季各十八日本之二
月只是陰陽二月一時唯有陰陽二月合聖六成
六時正月二月是木王時四月五月是火王
時七月八月是金王時十月十一月是水王
時臘月三月是陽土寄王六月九月是陰土
寄王欲論本月亦二二說若論土寄王亦二

二說故言足滿六時也若依佛法解二二說
者佛法有三時時有四月各有初分後分從
臘月十六日至二月十五日此初分春時從
二月十六日至四月十五日此二月春後分
從四月十六至六月十五日此二月是夏時
初分從六月十六至八月十五此是夏後分
從八月十六至十月十五此二月是冬時初
分從十月十六至臘月十五此二月是冬後
分故言若二二說足滿六時也又云正月三
月是陽月二月四月是陰月五月七月是陽

月六月八月是陰月九月十一月是陽月十月臘月是陰月故言若二二說足滿六時三三本攝依俗法者正月是春分本月攝後兩月悉屬春分四月爲夏本月攝後兩月悉屬夏分七月爲秋本月攝後兩月悉屬秋分十月爲冬本月攝後兩月悉屬冬分三三本攝也又云正月二月正是春時木於中王土寄三月攝屬春時四月五月正是夏時火於中王土寄六月攝屬夏時七月八月正是秋時金於中王土寄九月攝屬秋時十月十一月

正是冬時水於中王土寄臘月攝屬冬時土寄四季正時爲本各三月並攝於土故言三三本攝主攝於客客是土也依佛法言三三本攝者本時各三月既廢秋時以秋之三月各配入三時時則四月論本則三論攝則一故言三三本攝也問四時各有三月此是四三本攝何謂三三本攝答三爲一數以三而數故言三三爲本爾隨是時節消息者時如上說或四或三或二或攝等種種不同隨時以意消息斟酌去取若依佛法無秋時而言

四六

十

秋時發病此云何釋從八月半已還隨俗名秋而夏時攝八月下半以去隨俗名秋冬時攝隨時消息者二法之間而斟酌也代謝增損者春動肝病此可治春動脾病此難治夏動心病此可治夏動肺病此難治夏末冬初於秋分中動肺病此可治若動肝病此難治冬動腎病此可治若動心病此則難治論四時增損大略如此問四時皆動病何故去秋時解此爲二一爲破保常秋時萬物結實人計爲常爲樂爲破此著故去秋時佛爲弟子

保常心多故也二者爲開後安居立迦提月安居本名坐夏八月半內已還若是秋時便是坐秋爲此義故廢秋時爾從有善醫師下一行半荅犯觸犯觸有六一多坐二多眠此二多致瘕宜多行猗散之三多行四多猗五多語生風病宜多眠治之六多淫生一切病即等分病也若火少痰多若火多即熱壯若風多吹火成熱病若風多吹痰成冷病三事若等無病飲食得病者亦有六一過量食二少食不足而止三過飢食四逆時食未飢

盟六

十一

強與也五妨食如食肉飲生乳使人癩六不
曾食而強食如南人飲漿北人飲蜜若菜和
蜜令不結男豬膏煎白鷺肉令人癩若患熱
而飲酒食小麥生牛肉令人失明吐血痢血
若病痰而食甜肥醎酸令人嚏鼻多汁又癰
痢也六大者是六腑大腸小腸膽胃三焦兩
膀胱也從多風病者下二行荅病起時節四
月五月是風生時六月七月是風起時八月
九月是風滅時六月七月是熱生時八月九
月是熱起時十月至正月是熱滅時八月九

月等分生時十月十一月是等分起時十二
月正月是等分滅時十月至正月是痰生時
二月三月是痰起時四月至七月是痰滅時
痰是水病肺也夏日動風者夏日毛孔開通
外風得入內風動也熱病秋動者毛孔閉塞
熱伏於內不得行故成病等分冬動者春時
動水肺病不差至夏復動風風病不差至秋
復動熱熱病不差至冬俱動一切病故也二
月三月是痰起損肺肺病動也從有風病者
下八行半荅治病方文爲三初二行半未病

前以藥防次二行明正以藥治後四行病退以藥補風病夏服肥膩醎酸熟食者夏月毛孔開通具以肥膩潤塞之令風不得入醎酢性熱能消水令體堅實治於風虛熱食流汗引風令出又治虛冷風不得進冷甜是酥乳等能治熱也等分冬服甜酢等除風也肺病服肥膩塞毛孔令水不得入熱能焦水宣通故能治肺病也飽食發肺病食既多則腸胃盈滿故發肺也食消發熱者如食沃潤則熱病伏食消無潤熱病起也消已虛踈風氣入

第五十六

十二

體故發風也風踈補酥膩醎除風甜除熱肺帶風水宜吐也此中消文出真諦三藏疏中從善女天下是第六知己徧治文爲二一病輕聞說即差二病重服藥方除云云觀心者三毒等分是內病也數息不淨慈心因緣是法藥宜聞法藥得悟者信行人病差也作觀研心得悟者法行人病差也眼是春時舌是夏時鼻是秋時耳是冬時身是四季攝屬諸時妙好五欲增貪病麤惡五欲損貪病妙好五欲損瞋病麤惡五欲增瞋病平平五欲增癡

病違順五欲損癡病總三種五欲增覺觀病
偏動三種五欲損覺觀病是為增損之相也
犯觸者違情犯瞋順情犯貪不違不順犯癡
總三犯覺觀慢時即發瞋求須時即發貪僻
解時即發癡放逸時即發覺觀慈心治瞋不

淨治貪因緣治癡數息治覺觀

云云

釋流水品

文云一能流水二能與水與水者與安樂水
也一世安樂二出世安樂世安樂者如象負
水濟彼枯魚是也出世安樂者如發誓言於

未來世當施法食與菩提記是也流水者流
除苦惱水也一果報苦惱二業因苦惱流除
果報苦惱如治諸病人救彼渴魚是也流除
業因苦惱者授三歸說十二因緣讚佛十號
是也請父求方欲成流水之義從王借象欲
成與水之義既有二能那單以流水題品文
中既彰與水之義題品須安流水之名不煩
於文二義雙顯出經者之巧為若此也長者
者如法華疏中十種長者義也子者持水之
子故言子也此文是斷疑中第三結緣之近

由近由又二一弄引二正近由弄引又二一行恩布德二國人稱美並如文近由又三一明眷屬二見魚之緣三正救魚如文從未來之世當施法食下是第四正結緣又爲四一發誓願二思惟說法三正說法四魚改報生天酬恩供養就魚報恩文爲四一魚改報生天二天酬恩而下地三王見光問瑞四長者徵教而定答如文報恩有二義一事二理事者真珠四邊報水飲食因緣十號等四種澤也理者準涅槃文云施食令他得命表常令

他得樂是故得涅槃令他得悟是故成自在我如法求財是故得淨用四十千報常樂我淨之恩也第五結會古今者昔佛疑魚數樹神定判十千今神疑行淺記深佛爲說妙因緣今昔相關是故結會也

釋捨身品

盟大

十四

捨義甚多財位壽命獨以身當名耶此從正要得名受者須身餘則非要施者正捨身餘旁捨爾故言捨身品文爲四一問二答三衆得益四結成問者上聞大士治病救魚實爲

曠濟小人小蟲得二世益時衆願聞亡身殞
命感深契極之事行苦而果樂可得聞耶是
故請問佛答爲二一敘緣起二正明捨身緣
起爲十一地塔涌二大衆生疑三佛起禮四
樹神問禮五佛答禮六命阿難取七阿難述
骨狀八命示大衆九奉命取示十佛勸衆禮
皆如文從過去有王下是正捨身文爲二一
長行二偈頌長行爲四一明本眷屬二捨身
方便三正捨身四捨後悲戀就本眷屬爲五
一明本眷屬摩訶羅陀此翻大無罪文殊問

經云羅陀翻爲中摩訶波那羅或云此翻大
度誅摩訶提婆此言大天摩訶薩埵此翻大
心二游行三各述相四見產虎五各陳觀見
從作是念言我今捨身時已到矣下是捨身
方便方便爲二初述觀解二起誓願願行相
扶適產七日者見虎子頭上有七點知已七
日出山海經也又云七日眼開又七日不食
必死虎兒垂死知是七日或云鬼神示悟如
樹神數魚正捨身爲二一捨身二感動天地
捨身後眷屬愁苦先兩兄愁惱各說偈共向

盟六

十五

捨所次父母愁苦偈九十三行爲三初二行
通明昔行次別頌長行三結會初如文我念
宿命下別頌長行四行頌上本眷屬上有述
相陳觀今不頌餘皆頌從時勝大士下二行
頌上捨身方便不頌發誓從即上高山下頌
上正捨身感動也從是時二兄下頌上捨身
後眷屬愁苦從是時王子下頌上父母愁苦
從佛告樹神下第三結會結會爲三一結會
人二結會塔三結會誓願說是經時下大衆
所益也樹神是名禮塔下第四是結問意

釋讚佛品

此品從能所得名能讚是三番菩薩所讚是
一佛世尊能所合標故言讚佛品私謂三番
菩薩是能讚一佛是所讚一佛是能讚三番
是所讚三番是當佛一佛是現佛通而爲言
皆是能讚皆是佛故言讚佛品次第者因前
十七品故有今品何者序品敘大體如來遊
於無量甚深法性窮源極邊壽量品極果冥
深合廣能起大用懺品勸菩薩若欲修學當
如懺品滅惡讚品生善空品導成四王至散

脂誓願流通說請者之功德正論至善集明
說者之功德鬼神至流水說聽者之功德捨
身明行者之功德如是等利益出現世者皆
是如來大體大智大用金光明力既善始令
終初中後竟故諸菩薩等以讚讚佛稱揚教
及教主故言讚佛品此文為二十六一經家敘陳
列讚眾從此至彼金寶蓋刹施三業供養投
地是身同聲是口口身共暢意業也二正說
偈合六十五行半文為三一二二十行諸菩薩
說二十七行信相說三二十八行半樹神說

云私謂其文有四前三是能讚後一是所讚
所讚又是能讚能讚又足所讚故文云佛從
三昧起以微妙音而讚歎言善哉善哉樹神
善女汝於今日快說是言豈非所讚讚能讚
其文既明不須惑也又是印成三番菩薩讚
教從序品已來快說如來果地大體大智大
用菩薩修因也上文有佛禮舍利即果身禮
因身也今文有佛讚大懺大讚能請能說能
聽能行皆是快說也當知快說是果讚因菩
薩也即果口讚因口其義孱然果意讚因意

任運例成也云云問佛何處入定此云從三昧起若初將說經佛遊甚深法性今說將竟故從三昧起此經首尾皆在法性中說其文甚明若作入法性者法性自在四佛五佛同處各處共見異見四來四去一住一在隨人所觀皆無障礙也觀心者諸菩薩三業讚佛三業事可解三觀心者觀身不得身身空但有名字名字無量或捨身名檀乃至身空名智慧六度十度八萬塵沙法門名字即空說空不定空假非定假非空非有即顯中道三觀

盟六

十七

宛然事理六法皆悉具足若無觀慧事亦不成例如三衣六物若解其意三六俱成若不解者非但無六三亦不成觀心亦爾若得理觀六觀六成若不得意既無理觀事觀亦不成無六亦無三此之謂也此大好甚廣云云

金光明經文句卷第六

音釋

敷

下
革
考
實

也切

胡蝶

竦公

切壤也

土汝
山而

也附切

癘

疫制

也切

魁
睞

膾
膾

枯 古 一

切切切

猗

輕於
安宜

也切
不其

才自
與專

猪於
同切

同切
嗽

角色

也切

癰

白竹
赤竹

也切

赤
日

勝光

切勝
此止

勝方
肱方

水勿

府既
也古

黃

屏
切如

連
